

金石萃編

金石萃編卷一百五十一

賜進士出身 誥授光祿大夫刑部右侍郎加七級王昶撰

宋二十九

漢陰鳳凰山神碑

碑高七尺三寸廣五尺三寸二十六
行行四十五字正書篆額在漢陰

宋鳳凰山神昭烈公廟碑

□□漢陰之鳳凰山爲山鎮最鉅禹導嶠冢內方雖於
夏書不述顧饒風女□牛山峙其西東□氣象獨磊落
雄秀□□□金海濱之爲望宜建徽號降 神宅靈

日大振顯按圖經山亦□□□巒排嶂疊爲層□十有

二□□□□□□□如翔羽矗立千仞綿裘盤踞數
百里漢江繞其陽月河注其陰上列三湫下溉萬頃雷
風雲雨□□□□蛟龍□□山祇木魅百怪屏衛異時
宿將嘗據其險以備攻守其亦□□臣伏橫陸夷曠行
於□□□□□□□□不斷 神之啟當□□
□□□□□□□式祝號加公爵曰昭烈賜廟額曰靈□
以崇□□□□□□□□不塊□帶京□至

帝□□發祥□□□□之祝融汾之臺駘□司□山鳳
□□□□□□□□□□□□在國之封內□□
祀秩水旱疫癘則□□□祭元豐初 神以□□雨

雪錫□□□□□□□□□□□□□□附□□□

□□□□□□□□神之聰鑒□歆依民和□相影響

暨□□□□□□□□□□□□□□□□□□□□

鳳立祠□同委□壤惟神之貌象物儼然宣撫岳

飛奏請申□命□□□□□□□□□□□□□□□□

神冠□玉立慘氣威□駭心動目恍若見其驂馭

羣龍揮斥雷風漢紀將軍生面□□□□□□□□□□

□□□□□□□□烈矧惟邃殿寢宮長廊崇廡脩門廣庭渾

渾巍巍其齋□祠室井甃庖廩列豆□□□□□□□□

□□□□□□□□華煥鮮麗於神之膺享稱其

尊虔且於茲山增輔壯□□□之祝史則□□□榱棟
摧□□□□□□□□□蝕繪□□厥初除地藉草
滋甚於黷□ 守帥四明楊公□□往返展敬愀然屬
□邑令何君□□□□□□ 神均德茲土廟之
弊是忝於 神而愧 公之志敢不恪恭敕事於
時道洽民格□□□□□□□□□緒以充役
費竹木瓦甍鐵石丹堊以枚數斤會者四萬八千有奇
百工鳩力計□給□□□□□□□□□□□之
墮廢經始於紹熙改元八月癸未訖事於中冬之戊寅
此 公持本道漕節歸重臺府□□□□□□□□□

□□賦二詩冠冕前作又大書廟之額榜侈其光華歲
遂大熟無水旱疾癘先是已酉冬 公以□□□□

□□□□鐵石之心始敷密雲已布水沉之烟未斷
雨雪其雱之語揭於謝文士夫老交□爲美□□□
□□□□□□公像以誌棠陰仲以爲君子忱誠通
天寅熒之柄實總理百神 公抱負道學德業初遷

撫□□□□□□威伸於雷霆之餘迺沐以春
和之膏澤有如去橫費禁苛歛安邊陲和軍心興學校
作士類重農政□□□□□□險灘網舉條叙密輔
宏化列城叢祠方率職惟謹鳳亭繪像何翹亟大江之

月升太山之雲然令與民敬□□□

神屬仲記脩

廟工役因詔遺思於無窮嗚呼宇內山多以鳳名茲山

獨倚

神爲重

神之祠又倚

公爲重異時

山可磨滅

公之德永配

神不朽石泉客在景

仰令具碑文請亟書刻之仲三薰臨文□之古碣其□

□雪風雷祥貺異兆書之殆不勝書第欲鏤去箕筆刪

鬼愁志怪推顯晉□□章僊翁飛蛻之逝□□□□

□□□□之德與山俱高令青城忠義故家撫仲之言

日然是爲記紹熙二年十一月二十四日奉議郎宣差

知金州石泉縣兼管勸農公事王仲記承直郎宣差知

金州漢陰縣主管勸農營田公事何聖書眉山家應龍
篆額

按是碑乃宋紹熙時所立鳳凰山神廟記碑爲風
雨所蝕幾不可句讀就其文觀之知山神於宋時
曾加公爵并賜廟額宣撫岳公又奏請裝脩貌像
殿宇頗稱宏敞其云上列三湫下溉萬頃當是謂
龍神也鳳凰山在漢江左岸故曰漢江繞其陽月
河注其陰月河卽水經注所稱之月谷川也今漢
陰城實在漢水之北五十餘里襟帶月水地無高
山峻嶺左右坡坂殆卽水經注所謂月坂歟鳳凰

山峻增江岸高插雲霄宜爲宿將據守以備攻討
攷北史謂之金鳳山昶官陝右時因公至此徧訪
地志旁詢鄉民山神祠宇絕無人知惟殘碑斷碣
委棄榛莽而已

山河堰落成記

磨崖高七尺四寸八分廣一丈九尺八寸四分共
十六行行九字每字徑六寸許隸書在褒城縣

紹熙五年山河堰落成郡太守章森常平使者范中莪
戎帥玉宗廉以二月丙辰徠勞工徒堰別爲六凡九百
三十五丈醒渠四百一十丈木石工計七十二萬四千
九百有奇工以人計一十五萬九千八百有奇先是四

率夏大水六堰盡決妖使者被

旨兼守事會凡

役慨念民輸當四倍於每歲之常廼官出錢萬緡爲民助查沆賈嗣祖晏表張柄實董其事

按宋史河渠志山河堰祇載乾道七年吳玘發卒助役修堰之事此後無文自乾道七年至此僅二十餘年乃以紹熙四年大水決六堰此堰被決遂致重修晏案臨淄人知南鄭縣見鄒君碑題記

顏魯公送劉太冲叙

碑連額高五尺二寸廣二尺五寸兩截書上截十三行行十二至十四字下截十七行行十七字行書額

正書

□□□□城之華望者也自開府垂明於宋室澤州
考績於國朝道素相承世傳儒雅尙矣夫其果行

脩潔斯文彪蔚鄂不照乎移華龍驤乎雲路則公山
正禮策高足於前冲與太真嗣家聲於後有日矣昔余
作郡平原拒胡羯而清與從事掌銓吏部第甲乙而超
升等第尔來蹉跎猶居卑位雖才不偶命而德其無鄰
故冲之西遊斯有望矣江月竝魄秦淮頂潮君行句溪
匠及春水翦菽之子道在何居魯郡公顏真卿叙

右顏魯公帖口番本迺送到太冲叙也併及其仲氏
太真口舊唐史文藝有太真傳不紀其與伯氏繼登

天寶上第文集三十卷見館閣書目墓在縣北號柘
塘神市人月有祭禱必應溧陽人尤神之神道碑裴
度謨蔣潼書昔曾易置口解旋轉縣齋掾判官初得
之縣庖下僅存口百七十有九字同郡李兼經從相
與起口鄉賢出其家藏顏帖再摹入石并斷碑口口
廳壁叙言彭城華望以劉於此邑爲著口口墓云宣
城陳留是也開府澤州公山口禮表其先世也平原
從事銓部甲乙顏常汲引口也蹉跎卑位悼其窮也
句溪春水此邑時屬宛陵也鄭薰北望樓記言元載
貶顏夷陵別駕後遷廬陵刺史道出蒲塘有左伯桃

詩第序腦亡太冲彭三字考汝越帖亦然莫可補闕
云慶元己未上巳宣城戴援跋邑人秦堦書額

毗陵潘壽仁模刻

顏魯公送劉太冲叙鬱屈瑰奇于二王法外別有異
趣米元章謂如龍蛇生動見者目驚不虛也宋四家
書派皆出魯公亦只爭坐帖一種耳未有學此叙者
豈當時不甚流傳耶真跡在長安趙中舍士禎家以
余借摹遂爲好事者購去余凡一再見不復見矣淳
熙秘閣續帖亦有刻

畫庫室
隨筆

右叙載魯公集行書華華作折釵股法爲顏書之冠

按宣城戴援跋云得劉太真墓碑于縣庖下同郡李
兼經因出顏公送太冲真蹟遂刻石同置縣齋此碑
蓋刻于慶元間趙氏已不及見然真蹟猶藏于陝西
東氏吾邑宋閔叔遇東孝廉于京師獲見之紙碧如
玉墨黝于漆歷數百年如初落筆者首闕劉太冲彭
四字與刻本合冲弟太真史有傳登天寶上第文集
三十卷神道碑文裴度撰蔣渙書史既不爲太冲立
傳而太真傳又不及其兄微此碑冲幾湮沒無聞矣
米元章書史云此序碧牋書王欽臣故物也華陰王
宏撰云此序真蹟爲渭上大宗伯南子興先生故物

一孝廉借觀未還而逸其姓豈卽東孝廉也耶

金石錄補

劉太冲帖碧牋書宋時爲唐珂所收其子常語米老謂與智永千文柳公權等書同墓則世間已無此帖矣而董思翁跋又謂在趙中舍士楨家當時有審爲王洗購去之語豈果爲晉卿所得故流傳至今耶又米氏書史稱珂將才不偶命而德其無隣九字剪去今此帖九字無恙獨闕首行五字不可解也蓋唐人善鉤摹或別有搨本亦未可定此序不記所作之年按序中有秦淮頂潮句溪春水之語亦當在刺江寧時公以乾元二年六月自饒州移刺江寧明年二月

追爲刑部侍郎在江寧者僅八月則知此序與送蔡
明遠叙同時皆當在乾元二年也又叙中言昔在平
原拒胡羯而請與從事乃知公以平原刺史拒祿山
時太冲實與有功而舊史但稱清河客李萼不及太
冲非有此序則太冲一段謀畧幾沒殺千古矣則知
此序關係太冲不小非直移贈而已此序碧牋書碧
牋宜墨故在顏書中獨爲神潤

竹雲
題跋

此序淳熙續帖亦有刻與世間流傳本迥不同其鬱
屈飛動處更出今本之上今本首行全闕劉太冲者
彭五字或以小楷書補之淳熙本首闕上半行太冲

彭三字尙完冲字有微闕劉字闕右半劉上尙闕三字則不可知何字矣

虛舟題跋

寧遠記

碑連額高大六尺二寸五分廣三尺七寸八分兩截書上記十九行行二十五字下條目二十行行十五字正書隸額在

杭州府學

寧遠記

國子司業王介記

國子錄陳一新書

開禧二年今兵部侍郎戴公溪爲司成有李廼功壽朋者老矣不仕養於學謁司成具道太學有義家久弗尊

司成樂聞之亟訊其顛末云昔淳熙間故待制張公

宗元以所得分地七畝餘弃之學以葬遠方士子之不
率而死者名廣惠山出清波門並城而南過劉寺五六
里道梯子領步漸高坡隴相屬至方家壩卽其所也山
之東爲官衢西直循王府山其南接民家方氏墓北距
郎主簿山廣袤十有五丈幽靜閒寂面勢頗稱舊有守
者廩稍不繼棄之去以故殯者少地益不治司成命學
錄李君元白孫君淵往視之舊殯凡九各有表識喟然
歎曰朋友死無所歸於我殯是非學校之責乎乃哀金
錢加修焉卽土周而甃以石循山趾而繚以籬徹舊門

而改作之增爲三間以備時祀之所廣出入之路復命
守者給以券食旣成祭以安其神又定津送之費官以
給之制時祀之式使歲舉行之榜曰寧遠司成之惠甚
渥也嗚呼士不幸而死又不幸而貧或遠不能以歸葬
則殯於此者豈不愈於寄之僧舍乎朋友致歲祀墓丁
供洒掃政使有家殆不過是昔延陵季子葬其子於贏
博之間三號遂行孔子以爲合於禮然則斯殯也而遂
葬亦豈不可雖然庸廩不繼時祀不修則朋友義廢而
寧遠之意荒矣尙其永念之哉

嘉定元年九月日

條目如后

一每歲清明舉錄前期開諸齋每齋率錢叁鑲省委
公厨具鷄黍之屬至日舉錄一員輪請長諭二員同
諸義家致祭遇晴則行其儀用鷄黍從食果子共十
豆酒各三酌墓神用鷄及果子共三豆酒亦三酌並
備祝文香茶之屬祭畢以所饌給墓丁並隨行僕從
元造長卓貳隻用畢仍寄留墓丁家

一兩學生員有不幸身故家貧地遠合葬義家之人
本齋長諭保明申舉錄備申本監請官會貳拾千充
結砌等費委舉錄長諭及其鄉人營辦非就義家安

葬者不給葬之日請本齋集正直日送至墓所

一募丁陳勝月給係轉運司給到小券一名專充看守不許本監人輒行攬請如或運司給付不時許墓丁經監投狀本監卽與施行

陳口口刊

按此碑杭州府志引武林石刻記僅載撰書姓名及高廣行字之數不言碑舊立處所李制府衛西湖志金石卷并不載此碑可知此碑之不顯於世久矣碑云開禧二年今兵部侍郎戴公溪爲司成

宋史儒林傳戴溪字肖望

沈光作戴溪春秋永嘉講義序云字少望

人淳熙五年爲別頭省試第一

按宋史選舉志孝宗時在朝清要官

期親許驥子弟作待補國子別號
考按此別頭省試疑卽別號之訛
監潭州南嶽廟

紹熙初主管吏部架閣文字除太學錄兼實錄院
檢討官正錄兼史職自溪始升博士除慶元府通
判未行改宗正簿累官兵部郎官開禧時和議成
知樞密院事張巖督師京口除授叅議軍事數月
召爲資善堂說書由禮部郎中六轉爲太子詹事
兼祕書監權工部尙書除華文閣學士嘉定八年
以宣奉大夫龍圖閣學士致仕卒傳載溪之歷官
如此据碑則開禧二年官兵部侍郎已前官司成
史皆畧之碑云出清波門並城而南過劉寺五六

里道梯子領至方家壩劉寺者咸淳臨安志云紹興十八年建十九年賜褒親崇壽額西湖游覽志云俗稱劉孃子寺劉貴妃父懋因金人南侵獻錢二萬緡以助軍費高宗嘉之遂令建寺以爲功德畱青日札云西湖褒親崇壽寺乃紅霞帔劉貴妃香火院故俗稱劉寺紅霞帔者宋宮人品名也江湖後集載周端臣劉寺墳園詩萬頃蒼寒擁寺門寺牌金字御書存其規模可想梯子領同嶺似卽梯雲嶺在慈雲嶺東方家壩今作方家峪咸淳臨安志在錢湖門外路通慈雲嶺梯子嶺按爾雅釋

水注谿曰谷或从山集韻塿四方土之可居也又
水厓曰塿是峪塿義同而音亦相近然今人皆不
知有方家塿之稱矣至碑載循王府山郎主簿山
皆不可攷寧遠二字是太學義冢祠門之題榜記
中所列條目三則制簡而儀脩想見南宋太學師
生用意忠厚可以風世其云每齋率錢叁銀省者
正字通云凡園廓有孔可貫繫者謂之銀是銀與
貫同宋史食貨志錢幣不詳省字之義嘗見南渡
初製銅牌文云臨安府行用準二百文省準三百
文省準五百文省宋時民間行用有以八十及八

十五爲百者疑卽此省字之義歟祖在西湖修志
日揭得此碑及主講敷文乘暇日徘徊方家峪尋
此記中所載各舊蹟則荆榛彌望詢之山樵野牧
無有知之者矣並詳於此以志慨

澱山會靈廟碑

碑高三尺許廣二尺四寸文廿四行行廿七字正書
額題會靈廟記四字篆書在青浦縣澱山廟左壁

會靈廟記

祀天下之大典也德不被物功不及民者不在是典禘
所以報歲功也凡水旱疫癘螟螣則黜其方之神然則
在是典者庸尸素哉嬴秦時邢氏三女子死而有靈

能役鬼工各開湖泖潴亂流以河水患

激湖之

靈其季也罔罟之利舟析之益民歌與豐菑害不生一方之氓均飫其惠嘉定七年孟夏大旱奔走群望有禱輒爽知縣事李伯壽命主簿陸屋躬至巖高植木始然水立晝昏濺沫飛濤沮洳冠裳傍晚曉辟易陸固自若不衡不倚若有相者得魚得蛙連雨之徵必冀所求不獲不已白魚既躍蛙亦隨至霈雨霽注三日足用歲大有秋申聞朝廷錫號會靈揭榜之辰陸乃肅齋贊奉其行以侈君賜以荅神貺觀者如堵震動

山谷水天一碧幽巖咸若黃耆船背歎未曾有相眠而

作曰 神來止茲福我茲土千有餘歲不知幾縣吏之
禱於斯也一朝潛德撒覆於吾賢父母之手久矣吾

神怕其德而敷其惠也褒封之後凡所以惠我者亦豈
有加於疇曩而貳其心哉獨嘉吾賢父母能講明政之
所先務使 朝廷恩渥不及尸素之鬼足以風厲

素食怠事之人俾敏厥修予聞而嘉之遂櫟括其言而
文之俾修歲時之記者歌之歌曰

湖山兮蒼蒼海底兮天泱泱樓凌空虛突兀兮金銀錯
舳舻兮轉輸杭琰兮繞湖不知其幾千萬兮寄豐凶於
慘舒烟冥冥兮雲澹風蕭蕭兮葭莢貝闕兮襲靈寶物

不疵癘兮民不頽頽煥兮榜題雨露兮新滋 神之靈
兮聽之

嘉定九年孟秋既望前台州報恩光孝禪寺住持嗣
祖居簡記

寄理 勅賜進士出身嘉興華亭支鹽官建安
徐榮叟書并篆額

澱山普光王禪寺住持傳法僧 立石 高舉刊

按此碑撰者僧居簡書篆者徐榮叟居簡自稱前
台州報恩光孝禪寺住持雲間志載明行院記則
云勅差臨安府淨慈光孝禪寺住持北磻居簡記

嘉熙初元立此碑立于嘉定九年彼碑則在後二十一年矣 四庫全書錄其所著北磻集稱居簡字敬叟潼川王氏子嘉熙中敕住淨慈光孝寺因寓北磻日久故以名集其集詩文各爲一編宋代釋子兼有詩文者惟契嵩與惠洪契嵩之文博而辨惠洪之文輕而秀居簡此集不摭拾宗門語錄而格意清拔自無蔬筍之氣据此則居簡工文觀此碑可得其槩矣居簡晚年又嘗住嘉定南翔寺今尙存二碑是其所撰也徐榮叟宋史有傳字茂翁煥章閣學士應龍之子及考應龍傳不詳何貫

朱竹垞洞霄宮提舉題名記作浦城人此碑自稱
建安與題名記異傳稱榮叟嘉定七年舉進士歷
官通判臨安府累至端明殿學士簽書樞密院事
未嘗載其初任華亭支鹽官葢史略也碑云勅賜
進士出身此爲後人系銜用賜進士出身之所昉
而此上有寄理二字未曉其義以臆揣之當與權
攝治理同謂支鹽官非其本職一時暫寄耳其云
嘉興華亭則此時秀州已升嘉興府也支鹽官宋
史職官志食貨志皆不載此官雲間志倉庫有支
鹽倉在縣西北三十五步乾道六年閏五月奉朝

旨移置本縣又廨舍凡十支鹽官廨舍列于第十
是其職居于各官之末蓋卑甚矣廨舍在縣南二
百一十步榮叟之居此官志亦無傳可攷碑云嘉
定七年孟夏大旱知縣事李伯壽命主簿陸屋躬
至巖扃植木始然水立晝昏濺沫飛濤沮洳冠裳
傍晚辟易陸固自若不衡不倚得魚得蛙連雨之
微白魚既躍蛙亦隨至霈雨霽注三日足用朝廷
銀號自靈揭榜之辰陸乃肅齋黃奉其行觀者如
堵震動山谷云云雲間志不載災異華亭縣志祥
異不載嘉定七年之旱知縣事李伯壽雲間志僅

載知縣題名云李百壽嘉定七年任而亦無傳百
壽伯壽志與碑異或志有傳寫之訛主簿陸垕則
雲間志與松江府志華亭縣志皆不列于題名雲
間志載主簿廨舍在縣西七十步又亭館條下云
公餘風月在簿廳後嘉定九年簿四明陸垕建始
知垕是四明人也以求雨有應之主簿可謂賢矣
而志乘無傳賴有此碑傳之咸淳臨安志載陸垕
號盤隱官府判嘉定中與僧居簡倡和而不詳其
貫四明可据以資互證又檢靈隱寺志載垕所作
冷泉亭放闌水一詩云泉聲飛出闌委折綠陰間

此地原無暑多時不入山草欹疑石墜水定見魚
還難得同猿鶴游吟半日閑附錄于此以見其兼
能詩也碑書楷與蜡同從廣韻也其云民歌婁豐
與唐石經周頌婁豐年句同漢書屢俱作婁說文
有婁無屢新附始有之可知南宋時所行毛詩尙
仍唐本今監本汲古閣本則皆作屢矣潑山今在
平陸登巔望潑湖遠隔二十里外碑云水立晝昏
濺沫飛濤則宋時山猶在湖中矣祈雨取水以得
生物爲驗若今旱禱龍洞求得蜥蜴迎歸而雨降
是也得魚得蛙想亦蜥蜴之意故魚躍蛙至爲所

求之俱遂也沮洳冠裳旁睨辟易則風浪中見神之降矣朝廷賜榜屋親捧而來故觀者震動山谷大抵神舊有祠至此始有賜額也祠之創始無從追攷陸廣微吳地記但云秦時有女子入柘湖爲神卽此祠也雲間志云柘湖今堙塞爲蘆葦之場神亦弗祠今澱湖中普光王寺亦有三姑祠靈甚湖旁三數十里田者與往來之舟皆禱焉故老相傳秦時姓邢氏女兄弟三人卽柘湖所祠也至元嘉禾志稱三姑祠一在府南七十里柘湖一在東北七十二里澱山湖嘉興府志載海鹽縣秦置後

陷爲柘湖移縣武原鄉漢時又陷爲當湖移於今處然則柘湖舊屬海鹽三姑祠舊在柘湖因湖堙而弗祠則柘湖之祠廢久矣不知何年建於澱山雲間志未能詳也宋何松年三姑祠記則云秦始皇時邢氏有三姑長曰雲鶴夫人主沈湖次曰月華夫人主柘湖季曰降靈夫人主澱湖則是三女分主三湖而三夫人之號不能詳其爲何代所封今志乘可攷者惟柘湖與澱湖其沈湖之所在及有祠與否從無述及者此碑云邢氏三女子死而有靈能役鬼工各開湖泖渚亂流以泚水患澱湖

之靈其季也是亦以在澱湖者爲季女在別湖者爲長次二女但柘湖沈湖無明文耳然松年記又云夫人邢其姓家澱湖東地曰柘谿降聖夫人少奉普光王之戒故其後遂蒞澱湖夫普光王釋典向無此佛名至唐中宗時僧伽建寺請名普照王寺中宗以照字是天后諱乃改爲普光王寺語見曝書亭詩集註安得謂秦女奉普光王之戒耶莫儔澱山建塔記義燈禪師建塔夢中有榜題曰普光王寺後請額以符其夢其柘湖秦爲海鹽城在嘉興府南七十里安得謂秦女家於澱湖東之柘

谿耶然則舊說之訛傳自宋時已然矣今觀祠宇在普光王寺山門外左首數弓之地建屋二進前爲廟門後卽神殿各三楹不甚宏敞而門前殿後別無餘地可以再增屋宇似此形勢顯係先有寺而後有祠者松江府志以神爲寺之伽藍非無因也寺初建於建炎元年賜額於紹興八年則其剏基不過在建炎已前當不甚遠農田餘話稱舊有登禪師者始結廬於山居人捕魚竟日不得就師問故師曰但以爾舟載土詣吾山當遂所願積累旣久因以建寺蓋山本低小賴漁舟載土積累始

寬所謂登禪師或卽莫儔記所稱之義燈則建炎
已前建寺建炎以後建祠無可疑者碑云神來止
茲福我茲土千有餘歲蓋祖述何松年祠記之語
耳神最靈異謁祠者稍涉褻慢卽有禍災故祠門
常閉不敢輕啟碑在廟庭左壁與沈氏捨田碑內
外相背在牆外者蔓草荒翳從無人摩挲椎拓相
昔總修青浦縣志採訪者不能蒐及遂致失載雖
會靈碑文錄其大要而首尾不具茲幸朱君朗齋
錢君同人以重九登高啓巖扃陟荒逕尋得此二
碑亟爲備錄于此俾後日續修郡邑志時取以補

入也又檢曝書亭集有偕陳同知昂四人登潏山
寺謁秦女祠分得合字成三十韻又陳君緘寄普
光王寺二碑成詩三十韻二詩中皆無一語述及
紹興二十八年沈氏捨田及嘉定七年華亭主簿
陸垕祈雨請額之事是陳君當時緘寄別是二碑
迥與此碑及捨田碑不同而詩內又不言陳君所
寄之二碑何代鐫刻何人撰書所記何事詳玩楊
謙箋註此詩引用莫儔建塔記又載入青浦縣志
者有何松年三姑祠記皆宋人作似應有石刻則
陳君所寄或卽彼二碑今普光王寺內外遍尋除

會靈廟嵌壁二碑之外並無別項宋碑詢之寺僧亦皆無有見而知之者竹垞作詩在康熙庚辰距今祇百餘年昔所搨者今不可尋今所得者昔亦未見甚矣蒐羅金石之難也

羅池廟迎送神辭碑

碑高九尺三分廣五尺五寸十行行十六字正書後又小字版五行行書在馬平縣

荔子丹兮蕉黃雜肴兮進俟之堂俟之舩兮兩旗渡中流兮風汨之待俟不來兮不知我悲俟乘白駒兮入廟慰我民兮不嘖兮以笑鷺之山兮柳之水桂樹團團兮白石齒齒俟朝出游兮莫來歸春與猿吟兮秋與鶴飛

金華集卷一百五十一
三
北方之人兮謂侯是非千秋萬歲兮侯無我違願侯福
我兮壽我驅厲鬼兮山之左下無苦濕兮高無乾杭杜
充美兮蚍蜉結蟠我民報事兮無怠其始自今兮欽于
世世

宰相進退百官賢之遇否係焉

柳侯名重一世竟老遐陬繫誰之責嘉定丁丑春良
赴柳幕道長沙謁帥相安公先生臨別授坡公大
書韓昌黎亭神詩俾刻之廟傷其不遇也良甫到官
攝邑柳城繼易僉賓州回白郡太守桂公慨然從
之於戲侯賢而口誠獲遇先生必始終光顯于

朝奚至一損不復用韓之文得蘇而益妙蘇之書待
先生而後傳邦人聚觀咸嘆謂若昔不遇疇非遇
於今耶 先生察百官之進退有賢如 柳尙何憾
如韓如蘇蓋同一際遇大慶也重陽門生從政郎柳
州軍事推官權僉刺天台口良謹跋立石朝奉郎權
知柳州軍州事借紫永興桂如篋命廸功郎柳州州
學教授豫章廖口口書丹

右東坡書羅池廟迎亨送神詩筆意甚佳然較沈傳
師所書碑不同者十數字當以柳碑爲正

東里
續集

東坡公書柳子厚羅池銘辭道勁古雅是其書中第

一碑內步有新船秋鶴與飛昔人證之已明無足論者子厚英秀鬱鬱未吐沒爲明神亦是常理獨惟嫚客死當是伊伾文態未洗盡耳

兗州山人四部稿

余無此石刻本然有一墨本乃鄞張君所惠似是先用鈎法具間架後乃更用筆書之者穠艷而勁發有勢疑是南禺先生所臨因此思其原本必絕妙今跋稱是坡公第一碑諒不誣也羅池神能使嫚者死世俗驚畏正在此司寇乃以伾文態嗤之是董狐筆

書畫

跋

按原碑沈傳師書久佚集古錄言昌黎集本作蕉子

黃沈無子字是刻與沈同又云沈作而秋鶴與飛誤
是刻作秋與鶴飛無而字吟下有兮字與集本同
金石錄

按此碑韓文蘇書嘉定丁丑天台口良重刻於柳
州馬平縣羅池廟舊說相傳估客過柳江者捐一
紙卽無風波之虞遭亂失去雜入築城磚石中每
當築處城輒圯有司知其異物色出之仍置廟中
良缺其姓官柳州推官而署其跋云重陽門生所
未詳也丁丑爲嘉定十年碑當立于是時跋云良
赴柳幕道長沙謁帥相安公先生安公當是安丙

宋史安丙傳丙字子文廣安人累升資政殿大學士四川制置大使兼知興元府嘉定七年三月同知樞密院事兼太子賓客賜手書召之行次廣德軍進觀文殿學士知潭州湖廣安撫使良道經長沙則詣潭州謁安撫爲便也碑刻異同已詳諸跋不具論

建康府教授西廳記

碑高四尺四寸廣二尺七寸十八行行三十字正書在江寧

余同年進士諸王官教授四明范君之子允分教金陵貽書於余曰金陵學官舊惟一員今西廳是也 紹興

初留守尙書石林葉公以行都請增置故東西對立
西廳歲月最久棟宇寢壞殆不可居光到官之初懷一
日必葺之念而未敢及其私既七月學政粗畢始請于
郡留守侍郎陸興李公慨然興念捐金與材委吏督工
撤而新之其規摹位置受成於光而財物出入則有司
存經始於嘉定十四年十月之庚午落成於十二月之
丙寅舊門由學宮以出今易而南西直秦淮橫挹鍾阜
朝夕縱覽心目開明亦足自壯幸爲我記之余辭不獲
命因廣其意以復之曰天下之理內外本末初無二致
君子居室一日必葺亦猶吾身心不可須臾不加省察

而使各循乎理也故積基而堂架梁負棟室奧深嚴門
戶無壅君子之居也正其衣冠尊其瞻視望之儼然卽
之也溫君子之客也如鏡之明如水之定泛應縱橫無
適非正君子之心也自內以及外由末以求本豈容異
觀哉子之學旣得於家傳又能從先生長者游其必有
見乎此想其橫經退食招諸生登斯堂燕私從容凡心
目所寓亦必講明乎此不然則一室之安一身之便耳
豈子之志哉嘉定癸未上元日朝散大夫起居舍人兼
國史院編修官兼 實錄院檢討官鄭自誠記宣義
郎充江南東路轉運司幹辦公事趙與勲篆額

右重建建康府教授西廡記景定建康志天聖建學
置教授一員紹興九年因左丞葉公奏照西京例增
置一員分東西廡東廡在學之左西廡在學之右宋
史職官志但載列郡各置教官而京學教授有二員
畧不之及亦其疎也篆額者爲宣義郎江南東路轉
運司幹辦公事趙與勲攷宗室世系表未見與勲名
惟秦王德芳九世孫有與勲或卽其人乎

善研堂金石跋尾續

治平寺藏輪殿記

碑連額高七尺二寸廣三尺七寸十三行行
三十六字正書額題建藏殿記四字正書

所澤治平寺建藏殿記

勅額治平其來遠矣因初師置覆鉢之地故後人營環
堵之宮左眷金陵傍鎮驛道祝龍救旱靈感六朝蓋古
石書有可考焉自嘉定之已卯有檀越李清者距寺不
二里占籍寺東古彭城上屬也每出郊行不厭入寺家
世潤屋不慕經營見聞慈善雅所敬重其先捐錢披剃
本寺之僧曰一十有餘人

趙遠書惠書

而他利又有

公之施者多不此紀也與夫築梁通津發恩涓惠未易
傳許忽一日入山修葺與族弟釋法超從容話次適曰
此山僧衆足矣但延置禪苑歲無生計可供齋廚不若
闢堂左隙地而建藏輪焉姑欲寡助常住不亦可乎况

木植合用吾廬有之旣而諸請僧員法超法超爲之幹
造次以命工計慮獨啓巨誠鼎新創造天宮法輪寶殿
一所及下彫鑿像儀毋容衰外工畢更飾藏輪佛金一
面其興事僱工愈多愈費隨胥隨有畧不憚煩纒僅越
昔之月已慶落成之舉如土石竹木之工計者奚翅十
萬鈔貲糧縉費之計者奚翅一萬而寺無毫髮之補彼
亦奚慮及耶不虞幹造二釋殿成七八相繼圓寂悉以
藏事委於寶華者而寶華雖不能任得代師起之衣鉢
不容辭焉善哉且人之一發慈言則千里福應况李君
建佛塔廟者乎其功德爲如何念惟月浸歲深日更時

金石錄卷一百五十一
異謹刊諸石永爲善信之士之規鑒云嘗距宋癸未嘉
定十六年七月十五日攝藏事贊華記

時衆徒弟僧普寧志立善達法誠法圓寶海寶江
都勸緣住持釋

鄂州重修北榭記

碑連額高七尺九寸廣四尺四寸二十五行行四十
二字正書額題鄂州重修北榭之記八字篆書在江
夏

鄂州重修北榭記

鄂渚之勝以南樓北榭並稱南樓歸 元祐改作 元
符末脩口黃公魯直嘗見於題詠惟北榭冠子城之顛

在郡公堂之後不知自何時建立 乾道中于湖張安
國爲大書扁榜厥後達官名人稍有爲賦詩者然距今
亦五十餘載矣棟宇隘庠日就圯廢莫或顧省一夕大
風震蕩推屋山飄瓦如墜葉舞空屋隨以傾壓不可復
支子城亦久弗治土石墮隄榛莽蒙翳狐狸所窟虺蜴
所蟠於是昉議更葺先增甍北隅表二施崇三丈有奇
南袤尋有半崇與北等遂改建榭屋闢而大之敗檻腐
桷悉易以新旣成宏敞翬翬與南樓巖然相望始於一
郡面勢爲稱雖其高無所不矚而北望爲尤宜嘗試相
與憑檻遐睎則煙沙蒼茫天水無際西陵鄆杜安陸諸

山隱隱出沒雲外雲夢之決泝漢沔之縈迴皆可目略而指喻羣鴻匹鶴飛翔上下平蕪斷浦杳杳如髮暇日尙羊不涉級數十武而坐得千里絕特之觀殆前所未有也惟漢江夏太守所統疆域至遠今光黃蘄安信五郡之地皆故屬邑春秋時吳楚交戰山師往來之地水如清發洄澨山如內方大小別雖丘邑變遷而勢勝猶在與夫孫伯符之所討擊周公瑾之所摧敗陶士衡之所平殄其遺跡猶可詠訪而考求邾城臨江故堞宛然嘗笑其規撫特淺淺耳庾元規志驕才輕亦弗克有成三關九隄之塞魏梁交攻或得或弃南北強弱係焉以

見昔人爭戰之力不爲無意夫以地之相距雖有數百里之遠而據其要會實皆在吾環顧規置卷舒伸縮之中况郡居全楚上游與江陵襄陽實相爲表裏諸葛忠武嘗欲舉荊州之軍以出宛洛公瑾亦謂據襄陽以蹶操北方可圖二人之言若合符節而宋何尙之顧言夏口當荆江之中直通雍梁實爲津要豈非以地勢便兵力接故耶抑嘗据此論之若昔自南而圖北則易爲功自北而入南則難爲力故梁末曰陸贄和之敗郡雖暫屬高齊慕容儼死守半歲雖能拒退侯瑱等然卒棄之還南五季杜洪襲據州城遙附朱梁以扞淮南之侵朱

梁三遣兵援之皆至近地然無救於洪汜爲淮南將劉
存所克身隕國絕豈天塹之設果足以限南北耶抑或
彼或此亦存乎人之圖回智略如何耳夫惟俊傑之士
有志於當世要必討論之素精計慮之素熟異時行遊
坐息朝思夕維未嘗不在於此故一旦發而見諸施爲
則必卓偉絕人非臨事隨應率意而爲之者所可及傳
曰登高能賦可以爲大夫趙孟過鄭請七子皆賡以觀
其志夫所謂能賦者豈徒吟詠一時之風物景色哉必
也升高而望遠憂深而謀長覽山川之形勝考古今之
成敗究昔人謨議之得失與今日時措之宜其所蓄積

操存因感觸而發見所賦之志於是乎在王茂盤新亭之感逸少冶城之諷大較亦茲意也夫是則高明其居處緬邈其臨眺豈但以逸其一身而自適於耳目之間而已哉榭之廢興似未足書然余改作之意非游觀之爲則不可不明著以貽後之同志者俾得以周覽而繹思焉嘉定甲申三月丙午眉山李塉記

按此記撰者李塉但叙改作北榭之故而不自述其官位宋史附見兄李壁傳壁塉皆燾之子眉州丹稜人燾先以文學著而壁塉又齊名蜀人比之三蘇史言如此不能知其因何改作北榭也記云

乾道中于湖張安國爲大書扁榜史張孝祥傳字
安國烏江人高宗朝累知撫州孝宗卽位累知潭
州復待制徙知荆南湖北路安撫使其書此榜當
在是時孝祥號于湖工翰墨嘗書奏劄高宗見之
曰必將名世癸辛雜識又載其知京口時大書多
景樓扁却公帑潤筆

金石萃編卷一百五十二

賜進士出身 誥授光祿大夫刑部右侍郎加七級王昶撰

宋三十

句容縣五瑞圖并題記

碑高五尺二寸廣三尺一寸二分分作三截上繪圖中七行行七字下二十行行九字正書在句容縣

特秀之芝兩岐之麥同本之竹竝蒂之瓜蓮有一於此足爲上瑞况五者來備乎然則 邑大夫與其

同僚所以召和迎祥者亦必有道矣

紹定己丑寒食日漫塘叟劉宰

寶慶丙戌邗城張君侃來宰斯邑越兩歲而五瑞集

焉士民歌誦盈耳蓋自有不能已者 漫塘聘君劉
先生言語妙天下平昔不輕許可其歸美於感召之
所自者信矣 山陰王令君亦有跋語暨諸賢序贊
連篇累牘未易悉紀 大夫初不自矜至有謝同僚
之詩曰賡喜聯官忘爾汝故令元化奪胚胎及惠邑
士之詩又曰山川清美天下稀五瑞同時盡紀碑碑
上只言人物盛若言德政愧無之吁大夫其謙矣哉
是歲五月旣望免解進士充縣學學長江千里謹書

句曲司成刊

按五瑞圖題記漫塘劉宰爲句容邑宰張偁作也

宋史剡宰傅宰字平國金壇人紹熙元年舉進士
調江陵尉真州司法授泰興令父喪起爲浙東倉
司幹官默觀時變頓不樂仕尋告歸監南嶽廟理
宗初卽位乞致仕乃以直祕閣主管仙都觀端平
元年升直寶文閣未幾遷太常丞就道至吳門拜
疏歸進直顯謨閣主管玉局觀尋卒著有漫塘文
集集三十六卷今錄人四庫全書提要云主著
作甚富淳祐初王遂哀其遺藁十僅得四五爲
編訂作序名曰前集理宗收人秘閣世遂無傳明
正德間大學士新黃從內閣鈔出因授王臬鉉梓
潼爲三十六卷集中漫宋詩紀事云寧宗朝韓侂
禧一賦尤爲世所傳聞宋詩紀事云寧宗朝韓侂
胄枋國不復仕自號漫塘病叟卒謚文清此記題

紹定己丑寒食日己丑爲紹定二年是時正主管
仙都觀也江千里稱之爲漫塘聘君未詳所謂邦
城張偏史無傳宋詩紀事亦不見錄其遺句賴見
此碑江千里充縣學學長學之有長始見於此

陳盛父仙足巖題記

石橫廣八尺六寸高四
尺十一行行七字正書

魯國陳盛父位希賈兄縣叔元輝姪朱子俊胡子儀韓
仁父盛父饒德寬兄之官古申是日謁口山遊眞巖丹
桂遺香黃花發采舉盃相屬尙羊口晷臨分援筆以紀
歲月時紹定壬辰季秋旣望

龍壽禪寺復田記

碑連額高五尺九寸廣三尺二寸六分二十一行行四十三字正書篆額

雲蓋龍壽禪寺復田記

從事郎饒州德興縣主簿裘由庚撰

前奉議郎知安豐軍六安縣事胡遜駕書

朝奉郎改老充江南西路安撫司幹辦公事劉克遜

篆額

教有廢興時有衰盛物有得喪而理無古今存亡之間
士君子平心換事權衡於子奪之際者以其理也山林
枯槁之士視外物之去來得喪何有而有失則斯有復

者以其教也。繇物之往復以占其時，卽時之隆替以觀其教。此吾西山龍壽禪寺復田記之所爲作也。寺興於唐天復中，鍾傳據豫章，日奏置以處光化禪師官給田三千頃至。我朝祥符間，白石道者智新居之，徒衆

益盛，易律而禪，當其盛也，唱道鳴教，宗主其徒，代有其人，時往事遷，人亡教泯，鯨魚如故，而瓶笠之游鮮至矣。雖在籍之田棄而不有，亦漫不復省。紹定壬辰，連帥李公壽朋因法席適虛，聞僧祖開道價，卽具威儀迎致。開早恭清簡庵，得臨濟法，隨後讀華嚴，入大自在法。口至之日，口口藹聞禪，口口集開知，口口可囑也。口歲大

歎食口口給慨然口嘆有言寺故有田濟樵口曰裏湖
爲居民侵冒者八百六十餘畝開命閱籍果不誣謁諸
邑大夫 胡侯梲侯仁勇士 委官按視諭不妄盡理
而歸諸寺開欲誌侯之德不忘踵門而謁至再子辭不
獲則告之曰子之教以壞色爲衣以行匄爲食田於何
有後之人始華屋廣居豐衣美食田連阡陌無藝矣然
其歸欲其徒一意精進無衣食以累其心則一也有國
者病其無藝之蠹吾民也爲之經制不得貨鬻如世業
比則田之有者不可使無失者不可不復亦口其理然
耳君子之爲政一揆諸理起而正之於民無怨於僧矣

德子將安所託乎爲子之徒奉子之教撞鐘伐鼓敷座
展鉢於一餐一供思所自來以山谷道人食時五觀自
律以無盡居士拘溪煮藜自警不徒使大儒旁觀有三
代禮樂盡在是之歎則廢可興衰可盛侯之功不唐捐
矣吾旣以爲開勉然見姑蔑之旗者必取呼餘皇之舟
者必復侯宰邑以最聞將去爲郢州別駕北望中原志
清河洛得時與位挈輿地而歸 本朝使 趙祖忠
簡公義不臣虜之志一伸於六七十載之後則功烈偉
矣吾重以爲侯勉紹定六年七月日記

頊首 道宣 應堅 祖安 知事 宗起 宗智

淨聰 住持傳法沙門祖開立石

太學靈通廟牒

碑高八尺四寸三分廣四尺一寸五分作六截書每
截或二十一行或七行每行或四字或二十九不等
正行書在
杭州府學

尙書省棹

存心齋諭學生林居雅篤信齋長學生黃恭服膺齋
長盧方春齋諭林公槐禔身齋長章汝鈞齋諭黃綱
習是齋長朱應元齋諭龔琦允蹈齋長王日新齋諭
陳一中存心齋長周或守約齋長陳季彊齋諭吳附
鳳養正齋長張玘齋諭顏復之特志齋長水丘襄齋

諭周景廟節性齋長陳鼎新齋諭蔡夢雷經德齋長
姜文龍齋諭林拾誠意齋長高嘉齋諭戴鑫率履齋
長陳揚譽齋諭潘震孫循理齋齋長胡夢高齋諭蔡
廣時中齋長胡嗣家齋諭李時琇篤信齋齋諭林旂
果行齋長陳將齋諭陳士登務本齋長邵忱齋諭閻
丘成買道齋齋長章士元齋諭黃時若觀化齋長徐
信卿齋諭臧元孫立禮齋長王若訥齋諭葉寔劄子
居雅等竊見神祠之立 國典所繫自太學初興廟
貌隨建禱禳祈禱靈異未易殫述如今歲五月初倉
猝戢暴九月初潛弭火警陰有感孚如響斯答惟是

曩立神祠私以護學靈通爲稱未該

賜號近者生員陳懿孫形之夢兆以謂不當私畀名稱合經

朝廷陳乞神之有知能爲斯言揆之理義殊合典制矧今際遇

聖君賢相優崇學校若蒙寵榮特畀

恩秩命以徽號使神人兩安爲惠實溥伏候

指揮

牒奉

勅宜特賜靈通廟爲額封正顯侯牒至准

勅 故疾

端平貳年十二月

日疾

同知樞密院事兼權叅知政事鄭

押

叅知政事崔

未上

右丞相

押

特進左丞相

押

勅太學靈通廟神古我先王各因其方以祠后土示有
主也矧司我首善之地而不褒表之歟

口興建學爾以聰明正直妥靈其間凡鼓篋而入解褐
而去莫不駿奔走在廟用物宏多厭靈炳著不但呵星

妖叱鬼怪而蒸我髦士發揮斯文以爲邦家光斯亦有
陰助焉矣錫之徹侯都以徽號尙庶幾敬祭重祠之意
可特封正顯侯奉

勅如右牒到奉行

端平三年正月九日

特進左丞相清之

右丞相行簡

叅知政事與之

未上

同知樞密院事兼權叅知政事性之

給事中咨夔

兼權中書舍人

正月十四日午時都事郭口口口口受

倉部郎中口口崔端純

差除

付吏部

特進左丞相清之

右丞相行簡

忝知政事與之

未上

同知樞密院事兼權忝知政事性之

吏部尙書闕

工部尙書兼權口口

吏部侍郎闕

告正顯侯奉

勅如右符到奉行

主事徐元麟

權員外郎 令史高之才 書令史周裕 主管院

相

端平三年正月十四日下

按南宋太學乾道臨安志云紹興元年於凌家橋
東以慧安寺故基重建有六齋曰升俊經德敦厚
彌新賁文富文此所指乃臨安府學非太學也宋
史選舉志紹興十三年兵事稍寧始建太學續資

治通鑑紹興十二年四月甲申起居舍人楊愿請
以臨安府學增修爲太學從之是以府學爲太學
也續鑑又載十三年正月癸卯詔以錢塘縣西岳
飛宅爲國子監太學舊太學七十七齋今爲齋十
二曰褫身服膺守約習是允蹈存心持志養正誠
意率履循理時中据咸淳臨安志京城圖凌家橋
在豐豫門內

卽今湧金門

湧金池河之東此是初創府

學之舊基錢塘縣治在錢塘門內之南岳飛宅稍
在其東北紀家橋之東其後卽建國子監太學武
學也然則太學非卽府學舊基矣

續鑑云在縣西與圖不同其址

今爲浙江按察使署碑載二十齋曰存心篤信服膺禔身習是允蹈守約養正持志節性經德誠意率履循理時中果行務本貫道觀化立禮校之續鑑增多篤信節性經德果行務本貫道觀化立禮入齋餘十二齋名同續鑑此二十齋僅見此碑諸書皆不詳不知所謂七十七齋者又皆何名据云舊太學似指汴都然史無攷碑載存心篤信二齋有齋諭學生齋長學生其餘但稱齋長齋諭不云學生不知是官是生宋史選舉職官二志皆不詳其制碑載勅文廟是太學后土神祠其靈異之蹟與夫額

賜靈通侯封正顯稽之史志皆不載則此碑足備
武林掌故匪淺尠矣牒以端平二年十二月降三
年正月九日行正月十四日下勅後系銜云同知
樞密院事兼權參知政事鄭者鄭性之也參知政
事崔者崔與之也時與之由知廣州召除故注云
未上右丞相不著姓乃喬行簡也特進左丞相不
著姓乃鄭清之也皆据宰輔表知之此後又列銜
名六行四宰輔外增給事中咨夔者洪咨夔也兼
權中書舍人泐其名此後又列銜名四宰輔外增
倉部郎中崔端禮等八人不能悉攷矣

嘉熙題名

石高五尺四寸廣二尺三寸三分三行行七字正書

嘉熙己亥歲口口口口口口口希口携家過此與諱侍行理宗道統贊

碑十六石俱高五尺七寸廣三尺惟第三石四行餘俱五行每行或十一字七字八字不等正書在杭州府學

御製并書

朕獲承

祖

宗右文之緒祗通

燕

謀日奉

慈極萬幾餘閒博求載籍推迹道統之

傳自伏羲迄于孟子凡達而在上其道行窮而在下其

教明採其大指各爲之贊雖未能探賾精微姑以寓尊其所聞之意云爾

紹定三年所製淳祐改元孟春祇謁 先聖就賜

國子監宣示諸生

伏羲

繼天立極爲百王先法度肇建道德純前八卦成文三墳不傳無言而化至治自然

堯

大哉帝堯盛德巍巍垂衣而治光被華夷聖神文武四岳是咨揖遜之典萬世仰之

舜

於皇聖德至孝盡倫所以爲大樂善取人惟精惟一帝
心之純垂拱無爲堯道是循

禹

克勤于邦烝民乃粒蠲敷在躬厥中允執惡酒好言九
功由立不伐不矜振古莫及

湯

順天應人本乎仁義以質繼忠匪曰求異盤銘一德桑
林六事人紀肇修垂千萬世

周

關

關

武王

受天眷命繼志前人遐邇悅服偃武修文惟賢是寶法
度彰明建用皇極爰叙彝倫

周公

美哉公旦翼輔成周施兼四事才藝俱優制禮作樂惠
澤敷流有大勲勞宗社延休

孔子

聖哉尼父秉德在躬應聘列國道大莫容六藝旣作文

教聿崇今古日月萬代所宗

顏子

學冠孔門德行科首聞一知十若虛實有樂道簞瓢不
易所守口趨聖師睦若其後

曾

守約博施反躬三省孝爲德先祿仕不忍聖道正傳意
會神領一唯忠恕門人深警

子思

閒居請問世業克昌可雖非道孜孜力行發揮中庸體
用有常入德樞要治道權衡

孟子

生稟淑質教被三遷博通儒術氣養浩然深造自得亞聖之賢高揖孔氏獨得其傳

右理宗道統十三贊前有庚寅御書印後有辛丑御書之寶印今在杭州府學卽南宋之國子監玉海所謂淳祐聖賢十三贊也

潛研堂金石文跋尾

按此碑杭州府志題曰歷代帝王聖賢贊据碑贊凡十三帝王惟伏羲堯舜禹湯文武聖賢惟周孔顏曾思孟則不得以歷代賅之理宗御製序謂推迹道統之傳自伏羲迄于孟子是專爲道統作贊

也宋史道學傳序曰道學之名古無是也三代盛
時天子以是道爲政教大臣百官有司以是道爲
職業文王周公旣沒孔子有德無位與其徒定禮
樂明憲章刪詩修春秋讚易象討論墳典期使三
五聖人之道昭明於無窮孔子沒曾子獨得其傳
傳之子思以及孟子孟子沒而無傳此理宗之傳
所以上自伏羲以迄孟子專明道統不及他人也
理宗紀載淳祐元年正月甲辰詔曰朕惟孔子之
道自孟軻後不得其傳至我朝周惇頤續通鑑
錄但稱周
張載程頤程顥真見實踐深探聖域千載絕學

始有指歸中興以來又得朱熹精思明辨表裏混融使大學論孟中庸之書本末洞徹孔子之道益以大明于世朕每觀五臣論著啓沃良多今視學有日其令學官列諸從祀以示崇獎

王安石削去從祀亦在此

時戊申幸太學謁孔子遂御崇化堂命祭酒曹盛講禮記大學篇監學官各進秩一等諸生推恩賜帛有差製道統十三贊就賜國子監宣示諸生碑所載與史合又理宗本紀贊曰宋嘉定以來正邪貿亂國是靡定自帝繼統首黜王安石孔廟從祀升濂洛九儒表章朱熹四書丕變士習視前朝好

黨之碑僞學之禁豈不大有徑庭也哉身當季運
弗獲大效後世有以理學復古帝王之治者考論
匡直輔翼之功實自帝始焉蓋以黨碑僞學相較
論正謂此碑之於帝王治道大有關係也碑惟闕
三行是文王贊餘俱完好前有庚寅御書印後有
辛丑御書之寶印庚寅是紹定三年辛丑是淳祐
元年然則此贊是辛丑重書上石矣碑在杭州府
學今之府學卽南宋臨安府學非國子監也

詳見
前

國子
監址

太常大樂編鍾欵識

鐘高九寸腹徑六寸三分二行行五字正書

淳祐新鑄太常大樂編鐘

右淳祐編鐘一器於枚景間楷書淳祐新鑄太常大樂編鐘二行凡十字重十三斤十二兩以漢尺度之高九寸舞廣六寸舞修六寸七分銑徑七寸鼓徑六寸三分枚三十六自角及銑竟體作雲雷紋極細緻其形不圓而下垂特徵有裂痕音響不甚清越耳

王記

按欵識但言淳祐新鑄而不詳何年理宗本紀及續通鑑亦不載淳祐年鑄大樂編鐘之事惟宋史

樂志云理宗享國四十餘年凡禮樂之事式遵舊
章未嘗有所改作紹定三年行中宮冊禮並用紹
熙元年之典及奉上壽明仁福慈睿皇太后冊寶
始新製樂曲行事當時中興六七十載之間士多
嘆樂典之久墜類欲蒐講古制以補遺軼於是姜
夔乃進大樂議于朝夔言紹興大樂多用大晟所
造有編鐘鋪鐘景鐘有特磬玉磬編磬三鐘三磬
未必相應云云然無改鑄編鐘之文史無夔傳惟
宋詩紀事稱夔于慶元中曾上書乞正太常雅樂
得免解訖不第而卒則其議大樂亦在慶元年此

鐘鑄於淳祐年或是舊鐘敝損偶有新鑄非因新
定樂器而鑄也諸家記載無聞識以備攷

大學忠顯廟勅牒

碑殘缺僅存高六尺四寸廣四尺一寸六載書每載
九行至二十一行行四字至九字不等行書在杭州

廟學

人倫忠於缺必有缺之缺昭缺有功不缺謀帥之風

凛若春秋復缺此維興宅以赫缺邇其生之自來檻

顙冠帶不左缺干羽在缺極於隆名宜廟食增崇於

命紀英烈言言可畏而仰以迄于今辟雍湯湯永觀厥

成有相之道尙福茲土式勸爲臣可特封忠文王

奉

勅如右牒到奉行

景定二年二月 日

太保右丞相益國公口道

知樞院事兼叅知政事口

簽書樞密院事兼權叅知政事龍榮

時輅兼權給事中口孫

中書舍人口

二月口口午時知事

左司郎中

太保右丞相益國公

知樞密院事兼叅知政事

簽書樞密院事兼權叅知政事

權吏部尙書

吏部侍郎

告忠文王奉

勅如右符到奉行

主事傅起巖

郎中 令史陸宗機

書令史劉必昌

主管院口口

景定二年二月 日下

忠顯廟佐神

張憲可特封烈文侯

徐慶可特封昌文侯

董先可特封煥文侯

牛阜可特封顯文侯

李寶可特封崇文侯

口貴可特封尙文侯

勅忠顯廟佐神張憲等文武之道一而貫之以一曰忠

而已其有忠於所事死生以之此有國者所務白也爾
爲偏將實佐戎旃視姦鉄逆鼎而如飴凜義烈英風之
未沫觀其所主可使懦夫立匪唯有功於干城亦有助
於名教封侯廟食維以勸忠可依前件奉
勅如右膝到奉行

景定二年二月 日

太保右丞相益國公口道

知樞密院事兼叅知政事口

簽書樞密院事兼權叅知政事龍榮

時暫兼權給事中口孫

中書舍人

二月口口午時知事童受

左司郎中 付吏部

太保右丞相益國公

知樞密院事兼叅知政事

簽書樞密院事兼權叅知政事

權吏部尙書

吏部侍郎

告烈文侯

告昌文侯

告煥文侯

告顯文侯

告崇文侯

告尙文侯

奉

勅如右符到奉行

主事傅起巖

郎中令史陸宗機

書令史劉必昌

主簿院口口

景定二年二月 日下

按此碑前段勅文殘泐文有辟雍湯湯永觀厥成
有相之道云云後有忠顯廟佐神一行知其爲太
學忠顯廟碑也稽之杭州府志金石門載五碑一
曰封太學靈通廟爲正顯侯符勅牒文其一石端
平三年刻一曰封張憲等爲侯勅文暨寧宗國子
監詔旨俱理宗御書俱引錢塘縣志一曰岳王廟尙書省
牒端平三年正月牒一曰淳祐寶祐加封淳祐六
年五月牒一道寶祐四年八月牒一道碑額篆書
一曰景定勅封廟額景定元年八月碑額篆書俱引

武林石
刻記

五碑皆不詳建立所在實字訪碑錄載五

碑一曰太學靈通廟牒端平三年正月一日加封

太學土地文忠侯勅牒淳祐六年五月下列刻寶

祐四年勅牒一日加封太學土地文忠英濟侯勅

牒寶祐四年九月與淳祐六年牒同刻一石

俱在仁和

一曰太學靈通廟勅賜忠顯額牒碑景定元年八

月一日勅封忠文王及佐神張憲等牒殘碑景定

二年二月

俱在德勝

二書所載太學靈通廟牒端平三

年正月者已見前矣其府志所載封張憲等爲侯

勅文卽訪碑錄所載勅封忠文王及佐神張憲等

牒殘碑皆卽謂此碑也但府志於張憲勅文下又
云暨寧宗國子監詔旨俱理宗御書訪碑錄所不
及而今拓本亦無此碑或所引錢塘志有誤也又
所載景定元年八月碑府志但云景定勅封廟額
訪碑錄則云太學靈通廟勅賜忠顯額則是先有
賜額碑在勅封忠文王碑前一年而今亦未見然
据此語是忠顯額卽與靈通廟合矣府志祠廟門
不載忠顯廟惟有忠佑廟云在按察司署門外左
偏宋紹興三十一年建太學是十三年此語誤以岳武穆王故
宅爲太學立土地祠以祀王此語亦未晰以岳宅建太學在紹興十三

年其時未必即奉岳武穆爲土地以意度之初王建學時以靈通廟爲土神其後乃祀岳王也

卒時有女尙幼痛父冤抱銀瓶赴井死元至正中

附于祠俗呼銀瓶孃子廟然則銀瓶之附祀始于

元至正時其在宋時止祀岳王也太學土地既有

靈通廟正顯侯

端平三年牒

又有文忠英濟侯

淳祐六年牒

并此忠文王合之是太學土地有三矣此碑勅云

尙福茲土式勸爲臣可特封忠文王確是爲土地

之證然府志稱廟額爲忠佑此碑爲忠顯彼此不

同訪碑錄又載德祐元年正月有太學忠祐廟勅

封告據碑其忠祐實有其廟非卽忠顯之訛疑不

能明也府志忠佑廟只載附祀王女而不及張憲

等六人注引方象瑛謁岳忠武家廟

其時太學已廢故稱忠佑

爲家

廟記云中爲王廟張憲等六人配語與碑合此

碑後列一勅云忠顯廟佐神張憲烈文侯徐慶昌

文侯董先煥文侯牛皋顯文侯李寶崇文侯王貴

碑泐其姓据鄭元祐
精忠廟記作王貴

尚文侯此六人皆武穆部將

則正祀之忠文王爲武穆無疑但宋史岳飛傳孝

宗時建廟于鄂號忠烈淳熙六年謚武穆嘉定四

年追封鄂王寶慶元年改謚忠武未嘗有忠文王

之號

張憲等六人皆用文字爲封疑用之太學故
皆用文字而史於飛傳及張憲等傳皆不載

府志所載端平三年正月岳王廟尙書省牒不知廟在何處然與太學靈通廟同時頒降疑所謂岳王廟卽忠顯廟也六侯事蹟史惟張憲牛皋有傳憲傳云憲飛愛將也飛破曹成憲與徐慶王貴招降其黨二萬飛遣憲復隨州進兵鄧州遇賊兵數萬迎戰與王萬董先各出騎突擊遂復鄧州紹興十年金人渝盟入侵憲戰潁昌戰陳州皆大捷憲將徐慶李山復捷于臨潁會秦檜主和命飛班師憲亦還未幾檜與張俊謀殺飛密誘飛部曲以能告飛事寵以優賞卒無人應乃誘王貴告飛劫以

私事貴懼而從又有王俊者以姦貪屢爲憲所裁
張俊謀以憲貴俊皆飛將使其徒自相攻發張俊
自爲狀付王俊妄言憲謀遣飛兵令告王貴使貴
執憲張俊親行鞫煉使憲自誣謂得雲書命憲營
還兵計憲被掠無全膚竟不伏張俊手自具獄成
告檜械憲至行在下大理寺矯詔召飛父子至万
俟卨誣飛使子鵬孫革致書憲貴令虛申警報以
動朝廷雲與憲書規還飛軍憲坐死紹興三十二
年追復龍神衛四廂都指揮使閩州觀察使贈寧
遠軍承宣使牛皋傳云皋字伯遠晉山人隸岳飛

軍金人入寇破襄陽六郡敵將王嵩在隨張憲攻之月餘不能拔飛遣舉行裏三日糧未盡城拔斬嵩悉推功與憲僞齊驅甲士五千薄廬州飛遣徐慶與皋赴援敵人逼城皋遙謂曰牛皋在此爾輩何爲見犯衆鄂然不戰而潰飛分其功以畀慶從平揚么么計窮投水皋赴水縛么金人淪盟皋戰汴許間功最歷轉河南副總管紹興十七年上巳日都統制田師中大會諸將皋遇毒亟歸明日卒或言秦檜使師中毒皋云此憲皋二人之始末也董先史附見張玘傳云成州刺史董先爲制置司

前軍統制玘佐之紹興元年金將高瓊率衆取商
州董先禦之玘乘銳奔擊明年春偕先繇藍田渡
渭規取長安時劉豫據京師先軍乏食僞降豫不
挈家玘事其夫人如舊豫使人迎其妻先密書報
玘勿遣且述必還意三年春先自僞齊歸玘還兵
柄退就位此先與張玘之始末也其餘諸人並附
岳飛傳云建炎四年兀朮攻常州宜興令迎飛移
屯焉盜郭吉聞飛來遁入湖飛遣王貴傳慶追破
之紹興二年賊黨姚達僥青逼建昌飛遣王萬徐
慶討擒之二年賊曹成以衆十餘萬守蓬頭嶺飛

破其衆成奔連州飛遣張憲自賀連徐慶自邵道
王貴自郴桂招降者二萬與飛會連州進兵追成
成走宣撫司降三年春虔吉盜連兵寇掠帝乃專
命飛平之飛受其降授徐慶等方略捕諸郡餘賊
皆破降之餘寇高聚張成犯袁州飛遣王貴平之
秋帝授飛江南西路沿江制置使又改神武後軍
都統制李山吳全吳錫李橫牛皋皆隸焉四年除
飛荆南鄂岳州制置使飛渡江抵鄂州僞將京超
乘城拒飛飛鼓衆而登超投崖死復鄂州遣張憲
徐慶復隨州飛趣襄陽李成迎戰飛舉鞭指王貴

曰爾以長槍步卒擊其騎兵指牛皋曰爾以騎兵擊其步卒成夜遁復襄陽進兵鄧州成與金將劉合孛堇列砦拒飛飛遣王貴張憲掩擊賊衆大潰五年飛如鼎州揚么方浮舟湖中飛亟遣兵擊之舉巨木撞其舟盡壞么投水牛皋擒斬之六年命飛宣撫河東節制河北路首遣王貴等攻魏州下之僞濟屯兵窺唐州飛遣王貴董先等攻破之十年金人攻拱臺劉錡告急命飛馳援飛遣張憲姚政赴之又遣王貴牛皋董先楊再興孟邦傑李寶等分布經略西京汝鄭潁昌陳曹光蔡諸郡凡此

皆六人歷次助飛戰功之大略也六人中惟王貴被誘告飛劫以

私事貴懼而從寃不如五人之忠于飛也史有李寶傳玩其文別一河

北人自金拔身從海道來歸者未嘗隸飛麾下歸

朝立功高宗書忠勇李寶四字表其旗幟卒贈檢

校少保恐非從祀之李寶也牛皋封顯文侯據鄭

元祐重建精忠廟在西湖北山岳墓左記亦載此六人牛皋

作輔文侯府志冢墓門又載西湖東山街有烈文

侯張憲墓棲霞嶺北有輔文侯牛皋墓墓定香橋有

贈少保忠勇李寶墓觀其系銜不云崇文侯似係

河北歸朝之李寶非崇文侯李寶也又府志祠廟

門引錢塘縣志載昌文侯祠在府學爲本學土地

神爲徐文慶

文字衍

宋岳武穆王部將有戰功孝宗

朝褒崇及其部將遂賜爲昌文侯

此是理宗志誤作孝宗

牒

充太學士神

此語更誤

後改爲郡學仍奉以祠又有資

福廟在江干祀宋烈文侯張憲景定二年追封今

稱郡城都土地廟又有張烈文侯祠在東山街口

墓所唐臬撰祠記云侯蜀之閬州人武穆愛將或

曰其壻也墓與祠在棲霞嶺西去武穆不遠百步

許地又有忠烈二侯祠在衆安橋南棗木巷祀宋

封繼忠侯岳雲烈文侯張憲武穆死于獄二侯就

戮此地里人鄰其寃立祠祀之凡六人之有祠墓
可考者如此並附錄備攷碑于勅文年月後列銜
名四段其同者曰太保右丞相益國公口道名上一
字乃賈似道也曰知樞密院事兼叅知政事泐其
名一字乃沈炎也曰簽書樞密院事兼權叅知政
事龍榮乃皮龍榮也並据宰輔表餘官多寡不等
不悉攷

景定鍾欵

形製高廣悉與淳祐大樂
鍾同止一行六字正書

景定甲子新鑄

右景定鍾一器亦於枚景間楷書景定甲子新鑄一行凡六字重九斤其高廣修徑及枚數雲雷之紋皆與淳祐鍾同形製音響亦如之

王尚
玉記

按甲子爲景定五年此鍾形製雖與淳祐鍾同而其重則較前減十之四鐘之用不一此鐘無大樂編鐘等字不知其何所用也

朱子書易繫辭

碑八石每高六尺八寸八分廣一尺八寸七石各二行行八字行書末三石七行行廿五六字不等篆書在常德府學

經文不錄

朱熹書蔡元之刻

紫陽先生墨跡原刻在楚常志余既重修彭衙廟

李鐫

先師小影暨

大司寇像於庠因摹此刻

于明倫堂北徒托金石以傳不朽入廟瞻像登堂

睹墨

師模儼然儀形式法是在吾同志口時

大明萬曆貳十弍年夏六月吉立知白水縣口西

蜀劉夢陽口識

邑人經魁林

篆書

考是書在宋乾道間書孔子易繫辭說卦三節凡八
碑在明倫堂東壁依堂壁逆行至國朝正統三年戊
午歷年二百五十舊刻漫滅知府周鼎重刻刊正順

符教授廬陵

慶有跋

王功載記

右朱文公書易有太極一段蔡元定刻在常德府學
明正德乙亥吉水鄧璞爲嘉定縣儒學教諭復摹勒
于吾邑之尊經閣下今移置明倫堂西南向刻手不
情遜原本遠甚海隅士大夫罕見文公書得重刻本
猶珍而祕之予在都門琉璃廠書市得此本蓋猶常
德元刻筆法險勁精采四射殊可喜也

潛研堂金石文跋尾

困齋銘

石橫廣三尺三寸五分高三尺五分
十七行行十八字隸書在湖南零陵

大谷山劉芮

方耕道通判武岡氣直而好義臨事不避難力平溪洞
積年之寇一境安靜施及旁郡亡何忌嫉者不欲顯白
其功附勢者又能文致其罪望獄踰年賴 天恩

深厚姑謫零陵耕道感激脩省思有以報稱於是胡邦
衡名其室曰困齋張欽夫記之耕道又以銘見屬芮何
敢辭銘曰

澤无水困有言不信柔能撝剛樂天弗競豈無人爲拯
此困病拔本塞源遂志致命我觀聖人惟深惟幾三而
陳之窮測萬微或以樂死或以憂生或明而晦或晦而
明春水發源漫漫浮天霜風冽冽艸枯木折六爻升降

吾義則正二體變化吾心則定澤下而谷剛得其中水上而列惟塞必通嗚呼至哉德辯益明窮通寬恕誰謂困中有此至善

橋亭卜卦硯銘

硯縱廣七寸橫寬四寸五分上橫題橋亭卜卦硯五字篆書銘二行分左右邊華書背四行程文海銘四字一行在右下角宋謝侍郎硯大字一行居中趙元記二行在左並正書

此石吾友也不食而堅語有之人心如石不如石堅誰似當年採薇不食守義賢也

程文海銘

宋謝侍郎硯

大明永樂丙申七月洪水去橋亭易爲 先生祠扣

地得之 閩後學趙元口口

硯歛材石質堅駁蒼潤益宋謝文節公物也按史稱
公弋陽人寶祐中成進士以江東提刑江西招諭使
知信州元師東下公以兵逆戰於團湖坪張孝忠中
流矢死信州不守公變姓名入建寧唐石山轉茶坂
日麻衣躡屨東鄉哭已而賣卜建陽市上一統志載
建陽縣南門外有朝天橋宋紹興中建跨南溪醴水
十三道覆以屋七十三間又云謝疊山祠在縣南朝
天橋合之趙元所識則橋亭信有徵已特公被魏天

祐強逼北行時硯當不及攜遂致淪沒永樂間復出
於土其後三百餘年不知何時硯亦北來今完好如
初向爲天津周明經月東焯所藏月東工詩文善大
小篆居城東逆河東岸雍正初偶游城西海潮庵見
僧榻下一硯積土甚厚拂拭之知爲謝公物亟以米
易歸日摩挲於案夜卽抱以寢因以卜硯名其居余
與月東善時過其家考古書畫金石必出硯示余乾
隆丁卯秋月東染末疾旣卧床余數過視仍抱硯見
一夕謂余曰君每觀此撫之不忍去諸手是珍之也
我死當歸君己巳余由農曹之官粵西與月東不復

相見庚午夏月東抱硯且死語其孤曰是硯許查子
恂叔矣今恂叔官瘴鄉道雖遠言不可食其孤封題
寄粵以書述治命余潜然不自知其涕之交頤也是
硯自闕之燕之粵往復萬幾千里歷數百載而無少
剝損謂非神物護持耶

查禮記

按宋史傳稱謝枋得字君直寶祐中舉進士乙科
除撫州司戶參軍卽棄去明年復出試教官兼經
科除教授建寧府未上吳潛宣撫江東西辟差幹
辦公事坐事謫居興國軍咸淳三年放歸德祐元
年知信州二年呂師夔定江東地枋得以兵逆之

敗奔信州師薨下安仁進攻信州不守枋得入建寧唐石山寓逆旅中已而賣卜建陽市中有來卜者惟取米屨而已元至元乙十三年集賢學士程文海薦宋臣二十二人以枋得爲首辭不起二十五年福建行省參政魏天祐欲薦枋得爲功枋得見天祐傲岸不爲禮天祐怒強之而北枋得卽日食菜果二十六年四月至京師問謝太后攢所及瀛國公所在再拜慟哭已而病遷憫忠寺見壁間曹娥碑泣曰小女子猶爾吾豈不汝若哉畱夢炎使醫持藥雜米飲進之枋得棄於地終不食而死

李道源撰神道碑至元廿六年八月子定之奉柩還廣信明年九月葬其鄉之玉亭龔原門人諫而題之曰文節先生謝公墓又据行實載公四月初一日至燕京初五日死于驛不云在憫忠寺此疊山歷官殉節之大略也橋亭福建通志在建陽縣南朝天橋舊名濯錦明永樂十四年圯于水十七年縣丞趙璧重建橋上有謝疊山祠祀宋謝枋得枋得嘗賣卜于此橋上邑人祀之此橋亭卜卦硯之可考者也硯銘識云程文海銘宋謝侍郎硯大明永樂丙申七月洪水去橋亭易爲先生祠拍地

得之閩後學趙元丙申爲永樂十四年與通志合
此銘爲閩人趙元所鐫而云程文海銘宋謝侍郎
硯疊山官止於知信州未嘗爲侍郎其號疊山者
謫居興國軍時謫所有西山層疊因有千載西山
疊疊青之句遂以自號云疊山文集後附明山東
道監察御史李奎褒崇忠節奏詞稱宋忠臣謝枋
得弋陽人弋陽自歷代以來擅道學忠節之名者
獨枋得一人而已枋得妻李氏永樂初已蒙朝廷
登載烈女傳足以垂耀不朽奈枋得祠宇未立封
謚未加後人無所稱仰如蒙准言乞禮部定謚褒

贈仍行原籍有司創立祠宇歲時致祭云云而不
詳是時朝廷准行與否又集後附行實不著撰人
時代姓名有云至元甲申黃華平大赦枋得乃出
得還寓于茶坂設卜肆于建陽驛橋傍曰依齋易
卦小兒賤卒亦知其爲謝侍郎也侍郎之稱蓋始
見于行實朱彝尊曰下舊聞引韓襄毅公集載韓
雍請謚宋臣謝枋得疏竊見宋禮部侍郎謝枋得
乞勅禮部翰林院議加贈謚云云是韓雍具疏以
前先有禮部侍郎之官究不知加于何時又引景
泰實錄載景泰七年九月以巡撫江西右僉都御

史韓雍之請事下禮部於是少保大學士陳循等
議按謚法遵德博聞曰文謹身制度曰節請謚曰
文節帝如所議行是文節之謚由於景泰禮臣之
議並不因門人誄題之文皆所未詳也程文海字
鉅夫避武宗廟諱以字行故元史傳名鉅夫傳稱
鉅夫入元授宜武將軍管軍千戶世祖召見置之
翰林爲應奉翰林文字進修撰至元二十年加集
賢學士二十三年首陳興建國學乞遣使江南搜
訪遺逸三十年出爲閩海道肅政廉訪使是疊山
之被文海薦在二十三年却聘書流傳不朽雖鄉

塾童孺皆能誦而習之其被強入都不食而死在
二十五年硯銘皆述疊山不食之事似乎疊山入
都時未嘗攜此硯行卒後流傳人間而鉅夫官閭
海因以銘之据陳太常兆崙詩注稱文海曾任閩
海廉訪使適其時始獲此硯乃爲銘而仍歸之亭
吏則此硯沈埋建陽橋下由亭吏失守所致越百
二十餘年之後因建橋而掘土得之又越三百年
輾轉入於京師爲宛平查氏所得查諱禮字恂叔
號鐵橋宛平縣人得此硯時官粵西太守其後陞
任蜀中終湖南巡撫宦轍萬里恒以自隨海內文

人多作詩其時昶亦有詩紀其事畢秋帆尙書裏
詩詞爲上下二卷并摹硯形銘記刻以傳世名卜
硯集今恂叔子湖南觀察淳尤護惜之昶得其槧
本重疊山忠節故他硯銘皆不錄而獨存此并識
之

金石萃編卷一百五十二終

金石萃編卷一百五十三

賜進士出身 誥授光祿大夫刑部右侍郎加七級王昶撰
遼

涿州雲居寺四大部經記

碑高四尺一寸廣二尺五寸共二十五行行
五十二字至六十五字不等正書在房山縣

涿州白帶山雲居寺東峯續鐫成四大部經記

殿試進士趙遵仁撰

鄉貢進士王詮書

蓋聞嚴相好具慈悲師天人出生死者 諸佛之願力
也開羣迷入聖道薰種性達因緣者諸法之功德也

佛之願力既如彼法之功德又若此 佛法之道大矣哉然則三身應現資化以談其真三學對明惟經以標其右爲聖凡之宗要濟像末之根本有緣斯格無福靡臻是以周兆不祥化身以之西滅漢警宵夢像教由是東來遂得貝籍靈文時臻於近代就唐譯梵歲出於諸家釋教流通自茲甯盛若乃一軸一藏半偈半言或摸以香檀或書之緇卷尙能獨見苦而滌宿業締上緣而成妙果利益廣大思議其難矧有勒石傳文鑿山開室錄寶軸之妙說藏金口之微言水火不可漂燒風雨不可漬壞以備凌滅傳之無窮寔所謂施最上法盡未來

際者也燕都之有五郡民最饒者涿郡首焉涿郡之有
七寺境最勝者雲居占焉寺自隋朝所建号自唐代所
賜山在郡之西北五十里寺在山之陽掌寺之東望有
峯最高故曰東峯峯頂上有石室七焉經佇是室先自
我朝太平七年會故樞密直學士韓公諱紹芳知牧
是州因從政之暇命從者遊是山謂是寺陟是峯暨觀
遊閒乃見石室內經碑且多依然藏佇遂召當寺耆秀
詢以初述代去時移細無知者既而於石室間取出經
碑驗名對數得正法念經一部全七十卷計碑二百一
十條大涅槃經一部全四十卷計碑一百二十條大花

嚴經一部全八十卷計碑二百四十條大般若經五百二十卷計碑一千五百六十條又於左右別得古記云幽州沙門釋淨琬精有學識於隋大業中發心造石經一藏以備法滅遂於幽州西南白帶山上鑿爲石室以石勒經藏諸室內滿卽用石塞戶以鐵錮之其後雖成其志未滿其願以唐貞觀十三年奄化歸真門人導公繼焉導公沒有儀公繼焉儀公沒有暹公繼焉暹公沒有法公繼焉自琬至法凡五代焉不絕其志乃知自唐已降不聞繼造 佛之言教將見其廢耶公一省其事喟然有復興之嘆以具上事奏於 天朝我 聖宗皇

帝銳志武功留心釋典暨聞來奏深快宸衷乃委故瑜
伽大師法諱可元提點醵修勘訛刊謄補續續新釋文
塵而復興楚匠廢而復作琬師之志因此繼焉迨及我
興宗皇帝之紹位也孝敬恒專真空夙悟菲飲食致
豐於廟薦賤珠玉推重其法寶常念經碑數廣匠役程
迺藉檀施則歲久難爲費常住則力乏焉辦重熙七年
於是出御府錢委官吏付之歲析輕利俾供書經醵碑
之價仍委郡牧相承提點自茲無分費常住無告藉檀
施以時繫年不暇醵勒自太平七年至清寧三年中間
續醵造到大般若經八十卷計碑二百四十條以全其

部也又鐫寫到大寶積經一部全一百二十卷計碑三百六十條以成四大部數也都摠合經碑二千七百三十條若夫攝九類四生歸真寂無餘者莫尊於大涅槃大乘頓教方廣真筌一句之內包法界一毛之中安刹土者莫出於大花嚴破有歸無泯相逐性作衆經之軌躡爲諸法之元宗者莫歸於大般若求佛智見入佛境界斷纏縛之愛心去執着之妄想者莫如於大寶積如是經典鐫之以石藏之以山四部畢脩壯矣哉亦釋門中天祿石渠也噫竹軋歿而佛聲寢靈山壞而法不作後數百年熾然興者豈非時有遇而教有緣乎清寧

三年五月十二日大寶積初成郡守蕭公諱惟平天子
股肱法門塙塙下車之後以六條布政副 聖上之
倚毗退公之餘惟三寶留誠稟 如來之付囑欣其

遭遇寔謂寅緣乃請召余謂曰四大部經今續鐫畢見
聞之下幸會攸難願製好辭以爲刊記余弓裘未襲苦
塊居憂又以先父前剖是郡亦於經事私積願誠周任
未遷遽嗟奄逝敢以順先父之願遵良牧之請罔愧辱
蕪直以爲記大契丹清寧四年三月一日記

安國軍節度邢洺磁等州觀察處置等使崇祿大夫
檢校太師左金吾衛上將軍使持節邢州諸軍事邢

州刺史知涿州軍州事無管內巡檢安撫屯田勸農
等使無御史大夫上柱國蘭陵郡開國公食邑三千
二百戶食實封叁伯貳拾戶簡推平

漆水郡夫人耶律氏

西頭供奉官銀青崇祿大夫檢校國子祭酒無監察
御史雲騎尉男佖

司徒娘子耶律氏

女小娘子三寶奴 孫女興哥

房山縣西南四十里有山曰白帶山生懋題草又曰
懋題山藏石經者千年矣故曰石經山亦曰小西天

云北齊南岳慧思大師慮東土藏教有毀滅時發願
刻石藏閭封岩壑中坐下靜琬法師承師付囑自隋
大業迄唐貞觀大涅槃經成其夜山吼主香樹三十
餘本六月水浮大木千株至山下構雲居寺馬唐明
皇第八妹金仙公主修之洪武二十六年又修之正
統九年又修之山上雷音洞高丈餘四壁刻經四柱
刻像前石有扉維以開閉几案瓶罇皆石臺有欄橫
與堂亘堂左洞二右洞三堂下洞二皆經唐及元代
有續刻經目列石幃人傳洞火龍所穿也山下左右
東峪寺西峪寺西峪寺後香樹林香樹生處也夢唐

菴唐夢堂師居處也林後琬公塔也山多石碑二隋碑一仁壽元年王臣陳碑一仁壽元年王邵碑五唐碑一開元十年梁高望碑一開元十五年王大悅碑一元和四年劉濟碑一景雲二年寧思道碑一太極元年王利貞碑二遼碑一趙尊仁碑即此碑也碑作趙仁一天慶八年沙門志才碑二元碑一至正元年賈志道碑一至正二年釋法真碑帝京景物略

題題山椒赭垣聳立曰小西天山下即西峪雲居寺有塔二在寺北者曰北塔在寺南者曰南塔北塔下四角有唐時小石塔四旁刻銘頌西北角者爲景雲

二年寧思道書撰人名嵌入墻中不可考西南角者
爲太極二年王利貞文無書人名東北角者爲開元
十年梁高望書無撰人名東南角者爲開元十五年
王大悅撰無書人名燕都游覽志云王大悅撰并書
誤也至小西天卽石經洞洞寬廣如殿中供石佛四
壁皆碑石疊砌卽隋靜琬法師所刻佛經也字畫端
好有歐褚楷法無一筆殊缺左壁兩層共碑三十六
枚右壁三層亦三十六枚後壁三層共四十一枚前
門左右壁及門頂共三十三枚總共一百四十六枚
刻妙法蓮華等經後壁昏黑燭照始能辨其外又有

八小洞皆石窓錫閉鎔鉄灌樞自牕櫺闕之碑石或
卧或立時見一一大洞之右第一洞刻佛說恒水流
樹第經第二洞刻陀羅尼集等經大洞之左第一洞
刻令生歡喜名無垢等經第二洞刻金剛般若波羅
蜜等經其下有石井石井之左第一洞刻菩薩瓔珞
等經第二洞刻摩訶般若波羅蜜等經石井之右爲
伽藍殿殿右第一洞刻文殊師利普超三昧等經第
二洞刻千手千眼觀世音菩薩廣大圓滿無礙大悲
心陀羅尼等經大洞之左又有心經碑一金剛般若
波羅蜜經碑一伽藍殿旁又有金剛般若波羅蜜經

卧碑一餘碑林下不勝紀惟遼初續鐫四大部經一
記于刻石事頗詳今誌其畧于此記云東峰頂上有
石室七四大部經摠合經碑二千七百三十條云云
首云涿州白帶山雲居寺東峰續鐫四大部經記大
契丹清寧四年殿試進士趙遵仁撰考東都事略梁
王隆緒立年十二自稱天輔皇帝尊母燕燕爲承天
皇太后改大遼爲大契丹國又云治平二年洪基改
元曰咸寧二年改國號大遼按隆緒卽聖宗洪基卽
道宗是聖宗初立之年至道宗咸寧元年皆稱大契
丹國也但聖宗初立之次年卽改元統和而東都事

略則云立八年始改統和道宗卽位卽改清寧清寧之十一年改元咸雍並無咸寧之號東都事略于道宗初年失載清寧此又以咸雍爲咸寧誤矣遼史于太宗紀大同元年稱建國大遼于聖宗紀不載稱大契丹于道宗紀不載復稱大遼頗爲疎漏此碑稱大契丹清寧四年益見東都事略之有據余舊有汪退谷所書唐人題雲居山寺詩三章首爲范陽縣丞吉逾作詩云到此花宮裏觀身火宅中有爲皆是幻何事不成空晚籟鳴寒谷秋山響暮鐘欲歸林下路新月上前峰次爲軒轅偉作詩云不着登山屐捫蘿也

上躋石梁分鳥道苔逕過雪霓梵宇千花裏秋聲萬
籟齊周遊興未盡鐘磬度前溪次爲吉駒騄作逾從
子也詩云石室最高峰攀躋到此中白雲連晚翠清
磬度秋風未悟無生理寧知有想空且歸山下寺還
欲問支公汪跋云此三詩今在房山縣石經山全唐
詩未收特爲錄之予旣閱石經洞諸碑三詩竟未之
見石井二又大石并一俯視深遠僧云鑿井時以斗
米易斗石始成有唐大中六年碑略記鑿井事碑陽
卽元和四年琢鹿山石經堂記幽州盧龍節度支度
營田觀察處置等使開府儀同三司檢校司徒兼侍

中彭城郡王上柱國劉濟撰又尋觀音洞約三里許
再上卽曝經臺唐碑一年月已模糊尋別逕下山游
香樹巷巷在雲居寺左有金泰和二年廣公禪師塔
記還寺至南塔下小石塔一刻大遼涿州涿鹿山雲
居寺續秘藏石經記懋題沙門志才撰後有石經目
錄天慶八年戊戌五月建志才文已載入日下舊聞
惟目錄未載二十一日曉行寺左右蔬圃中于右得
元至正二年釋法禪碑帝京景物畧作法正誤于左
得遼統和乙巳王正碑正邑人鄭熙書并篆額碑左
又有大唐涿鹿山雲居寺新鐘記碑剝落殆盡撰人

年月無考

查禮懋題上方
二山紀遊集

按白帶山漢書地理志清河郡有懋題縣顏師古
注懋古莎字雲居寺在白帶山西峪石經在小西
天石洞中四大部者一曰涅槃部一曰華嚴部一
曰般若部一曰寶積部其說查恂叔紀遊集已言
之詳矣碑記云太平七年故樞密直學士韓公諱
紹芳知牧是州暇遊是山見石室經碑且多皆沙
門靜琬於隋大業中所造奏於天朝出御府錢歲
析輕利俾供書經鐫碑之價自太平七年至清寧
三年續鐫造成四大部數清寧三年五月十二日

大寶積初成郡守蕭公惟平召余製辭刊記按遼
史傳韓延徽幽州安次人孫紹勲紹芳紹芳重熙
間叅知政事加兼侍中出爲廣德軍節度使卒遼
史地理志乾州廣德軍上節度本漢無慮縣地聖
宗統和三年置以奉景宗乾陵傳載紹芳之爲廣
德節度在重熙以後而不載其太平七年知牧是
州郡守蕭惟平史無傳蕭作蕭借用字結銜稱崇
祿大夫史百官志不詳官階崇祿之階無攷末載
其男佖之婦爲司徒娘子亦未詳撰者殿試進士
趙遵仁其父前司是郡亦不知其名史無選舉志

惟於禮志嘉儀下載進士接見儀進士賜等甲勅
儀進士賜章服儀三條而不詳殿試之制遵本紀
聖宗諱隆緒母蕭氏小字燕燕乾寧四年九月癸
丑卽位統和元年六月甲午上皇太后尊號曰承
天皇太后群臣上皇帝尊號曰天輔皇帝與東都
事畧合

賜臺山清水院藏經記

裴本高廣行字皆不計
正書在京師大覺寺

賜臺山清水院創造藏經記

燕京天王寺文英大德賜紫沙門志延撰

金石錄卷一百五十三
十
鄉貢進士李克忠書

賜臺山者薊壤之名峯清水院者幽都之勝槩山之名
傳諸前古院之興止於近代將構勝緣旋逢信士今優
婆塞南陽鄧公從貴善根生得淨行日嚴咸雍四年三
月捨錢三十萬募諸僧舍又五十萬募同志印大藏經
凡五百七十九帙創內外藏而翕措之蒞事既周求爲
之記聊叙勝因俾信來裔

咸雍四年歲次戊申三月癸酉朔四日丙子記

燕京右街檢校太保大卿沙門覺苑

通天門外供御石匠曹辯鐫

拔清水院在京城西七十里距 圓明園三十餘
里宛平縣所屬山半有泉下注如垂紳至山麓則
有龍潭以緒之山側有鷓鴣谷見明王嘉謨薊邱
集今無攷矣清水院之額始于遼而沿于金帝京
景物畧載金章宗有八院此其一也後易名靈泉
明宣宗宣德三年建寺更額大覺今仍之寺中穹
碑易見者惟明碑兩面刻宣宗英宗御製文此碑
在寺內龍王堂遊蹟所不到故傳揚絕少乾隆戊
戌九月二十七日昶從寒蕪落葉堆中搜得之摩
挲確誦回環數四因歎北方石刻可証遼金史者

甚夥惜無好事者搜抉出之也碑額書奉爲太后
皇帝萬壽大王千秋皇帝卽道宗太后則道宗母
仁懿皇后蕭氏也遼史傳蕭氏小字撻里興宗后
道宗卽位尊爲皇太后清寧二年上尊號曰慈懿
仁和文惠孝敬廣愛宗天皇太后大王者遼百官
志初名夷離堇太宗會同二年改稱大王有南北
二院皆分掌部族軍民之政謂之知大王事道宗
紀咸雍二年三月以東北路詳穩耶律韓福奴爲
北院大王三年十二月以東北路詳穩高八爲南
院大王以臆度之燕京當爲南院所屬所稱大王

或卽高八也碑云賜臺山者薊壤之名峯清水院
者幽都之勝槩薊壤卽薊縣唐建中二年析薊縣
置幽都縣遼開泰元年改幽都爲宛平碑蓋從今
稱也遼地理志玉河縣本槩山地劉仁恭於大安
山創宮觀師煉丹羽化之術于方士王若訥因割
薊縣分置以供給之在京西四十里遼之薊縣改
名析津今爲大興遼之玉河析宛平地置而云割
薊縣者當由兩縣犬牙相錯之地也志明云在京
西今之順天府遼爲南京析津府遼言京西正與
今同則清水院似在玉河縣地今山左右尙有南

安窠北安窠之名或即遼志所謂大安山之南北也鄧從貴爲南安窠村人所居近清水院也檢畿輔通志建置沿革不載玉河山川內不載陽臺山朱氏日下舊聞不載志延藏經記皆失之疎畧因詳識之碑末沙門覺苑結銜稱檢校太保大卿大卿之稱金百官志無攷

行滿寺尼惠照建陀羅尼幢并記

幢高六尺六寸八面其第一第三第五第七四面廣九寸七分或九寸八分餘四面廣六寸八分或六寸九分除窠後一面四行皆刻人名不篆外共計大字二十九行行三十一字正書在京師

唐開元三朝灌頂國師和尚口口口口口口開府儀

同□□□□□食邑三千戶食實封三百戶□□□

□□□□□□□□□□寺三藏沙門□□譯

佛說佛頂尊勝陀羅尼咒

文不錄

觀自在菩薩如意輪陀羅尼咒

文不錄

法念相真言

文不錄

大吉祥大興一切順陀羅尼咒

文不錄

受戒弟子優婆塞范陽王□□製文

噫尊莫尊于 師長重若重于 君親義本在三思

無與二况 華昨承 法雨潤未離身俱想 戒

雷聲猶在耳痛舊山而忽隱 毫相驚新塔而已外

既依差無化火之能恨不異雲而從今但壇哀座
下投淚庵前求 道瘥之明則梁本其壞思 法

息之報則昊天罔極其不可已當如之何迺建妙幢上
利審印託難思之句義變無盡之光明穢增 聖道

之緣兼塞妄情之戀願於北地開 天眼以照隔不

捨下根運 神力而加被用鵠信手直至道場期此

消塵少報萬一

維大康元年歲次乙卯七月辛酉朔二十四日甲申

庚時建

門人傳三口戒口法大德講經論賜紫沙門裕口。

講經律論沙門裕景 講經律論沙門裕英

□□大德講經律論沙門裕□ □□大德講論賜

紫沙門裕□ 業論沙門裕□ 裕淨 裕正 裕

□ 裕□ 裕世 裕顯 裕轉 裕振 裕權

裕□ 裕徵

□□□□□□□□□□上座□行大德沙門

□□

建幢施主行滿寺講經律論尼惠照 悟寂院傳大

教尼志覺 趙文保 妻張氏 男士林 士章

士英 出家男□□男□式孫男稅金奴孫女師

口口 娘口女 口口口氏 口口王氏 何惟口

妻張氏 男何年 新婦口氏 孫蓮兒

涿州博陵郡石匠邵文景成造

按此幢前刻佛頂尊勝陀羅尼咒次刻如意輪陀羅尼咒次刻大吉祥大興一切順陀羅尼咒後列范陽王口口記泐其名又列沙門等名內裕淨裕正裕世裕顯裕轉裕振裕權裕徵名與下幢同此幢大德講論賜紫沙門泐其名當是裕仁裕正下泐二人名當是裕祥裕諦並据下幢證之記內既依當卽瞻依借用字求道愆泛明當是求道塵之

明別體字

京西戒壇寺陀羅尼幢并記

幢高六尺二寸五分八面其第一第三第五面面廣八寸九分各五行第二第六面廣六寸九分第四面廣六寸七分各四行以上共二十七行行皆三十七字其七面廣九寸四分第八面廣六寸六分此二面一八行一六行刻沙門及邑人姓名字數每行五十八至九十五不等正書記行書在京師

唐開元三朝灌頂法師和尙三藏沙門 奉詔譯

聖千手千眼觀自在菩薩摩訶薩廣大圓滿無礙大悲

心密言

文不錄

佛說寶篋印真言

文不錄

於戲道尊德貴自古而然生榮死哀口口能致惟威

人之深者則報禮之重焉伏自 我故壇主大師能
事既周化緣忽盡四生孺慕號咷如喪於所天七衆
心摧辭踊疑無於厚地雖寶棺備禮口氈送終尙增
難捨之哀莫抑無窮之戀遂當遺塔前建勝幢仰憑
佛印之大威上荅 慈雲之巨蔭庶茲塵影俱變
光明嚴因地而速見法身滿果海而長爲佛事今德
滋等共思追遠所集至微豈能必報深恩聊用表其
誠意

維大康三季歲次丁巳三月辛亥朔十四日甲子坤
時建

奉爲 故壇主崇祿大夫守司空傳菩薩戒大師特
建法幢記 門人傳戒大師講經律論賜紫沙門裕
經 三學寺經法師詮圓大德講經律論沙門裕貴
口口大德講經律論賜紫沙門裕林 淨戒大德
講經律論沙門裕文 通淨大德講經律論賜紫沙
門裕仁 講經律論沙門裕和 業論沙門裕淨
裕正 裕祥 裕諦 裕世 裕顯 裕轉 裕振
裕權 裕口 裕敬
寺主口口大德講經律論賜紫沙門裕依 當寺圓
通大德賜紫沙門裕住

崇國寺大堦率邑 邑人前管內左街僧錄淨慧大
師賜紫沙門裕方 邑人前東京管內僧錄詮論大
師賜紫沙門裕企 邑人提點張口恒 邑長康德
從 邑澄石王 邑錄邢文正

邑人陳口正 邑人康口 邑人口從口 邑人口
景 邑人楊士口 邑人口口 邑人口貴 邑人
口從諒 邑人王惟口口 口勾當邑人口口

邑人高詮

邑人判官陳口口 邑人口口 邑人楊口 邑人
范口 邑人口口口 邑人馬口 邑人李口口

邑人劉口

邑人平口

邑人陳口

邑人王口

邑人孫口

邑人張鞏

邑人張珪

邑人賈口

邑人孫文式

邑人王口口

邑人李口

邑人周口

邑人賈口

口 邑人齊口

邑人張口口

邑人口口口

邑

人趙口口

邑人楊口

邑人李口口

邑人祁口

口 邑人劉口口

邑人魏口口

邑人吳廷口

邑人劉守素

邑人劉化

邑人高文智

邑人劉

俊 邑人郭善

邑人王

邑人郭口

邑人石口

邑人李口

邑人劉口 邑人張文口 邑人張文口 邑人張
口口 邑人李口 邑人李口 邑人孫惟辛 邑
人張口口 邑人張口口 邑人張口口 邑人李
諫 邑人劉口 邑人李從一 邑人王守口 邑
人段德

邑人劉口口 邑人趙口 邑人王口 邑人陳口
邑人朱口 邑人劉口 邑人杜口 邑人田口口
邑人李口 邑人鄭口 邑人馬口 邑人傅文
口 邑人賀從令 邑人孟日辛 邑人王亨 邑
人曹德方 邑人胡德義 邑人郭德 邑人李文

秀

邑人王口 邑人王口 邑人李口 邑人王元

邑人齊口 邑人齊口 邑人梁口 邑人張口

邑人王口口 邑人孫口 邑人董口口 邑人李

口 邑人大口寧 邑人李口口 邑人齊口口

邑人口昇 邑人郝善 邑人口惟進 邑人李德

方

邑人口口 邑人口口 邑人口口 邑人田口

邑人王口口 邑人陳口 邑人趙口口 邑人劉

口 邑人口維正 邑人陳口口 邑人劉文口

邑人魏慶 邑人王□□ 邑人曹□□ 邑人齊

□□ 邑人李從正 邑人李用 邑人楊從正

成洙□子人張德正婦□

邑人故邑長王□□ 邑人故舉事高□□ 邑人

高□□ 邑人業鄉貢進士□□ 邑人成守□

邑人□□ 邑人遼德均 邑人馮□ 邑人韓□

邑人張□ 邑人劉進 邑人陳□ 邑人康□

□□□

書幢文人三司書表康□

按此幢前刻大悲心密言次刻寶篋印真言

文皆
與今

本多後記不詳撰者何人記稱幢爲故壇主大師
而作壇主結銜但曰崇祿大夫守司空傳菩薩戒
大師而不詳其名號後列門人寺主等十九人內
裕淨裕正裕世裕顯裕轉裕振裕權裕徵名與隨
羅尼幢同又列邑人道教一百四十二人書幢人
康口一人幢建於大康三年大康爲道宗紀元下
署甲子坤時建坤時疑卽申時或當時書體多借
用字此蓋借坤爲申也然隨羅尼幢署甲申庚時
建則用幹不用支此幢之建與前祇隔三年似同
一例不應作申殊不可臆斷

憫忠寺石函題名

石函共四面橫廣二尺九寸高二尺五寸統計七十四行字數二十至三十一不等正書在大興縣大遼燕京大憫忠寺紫褐師德大衆等

天水嚴甫書

故燕京管內懺悔師鈔主崇祿大夫守司徒慈智大師賜紫沙門覺晟

故懺悔主燕京管內左右街都僧錄崇祿大夫守司徒聰辨大師賜紫沙門善製

口燕京管內左右街僧錄提點宏法竹林揔覺大師賜紫沙門惟道

口口燕京管內左街僧錄判官寶集講主覺智大師賜
紫沙門文牒

華嚴講主通法大德賜紫沙門蘊口

講神變口辯慧大德賜紫沙門蘊潛

講經論文範大德賜紫沙門義微

講經論演奧大德賜紫沙門義雷

講經論慈智大德賜紫沙門惟軫

講經詮微大德賜紫沙門義融

前校勘法師證教大德賜紫沙門蘊寂

三學論主辯正大德義景

寺主兼寶塔主沙門溥滋

尙座沙門惟常

都維那沙門智印

閣主沙門文螢

閣主沙門道義

殿主沙門智揀

藏主法藏大德文該

太子殿主沙門省純

東塔主沙門善祥

西塔主沙門通潤

□□ □□ □□ 栖及 崇杲 允的 思雨

廣深 惟顛 歸仁 □□ 道存 昭信 允祥

志操 淨慧大德悟景 義樞 法才 思行 道口

仁峭 善超 習行大德惟整 崇忍 文暎 文式

崇均 智敏 □□ □□ 法興 文存 從福

變滋 道遜 志深 文瞻 覺忍 □□大德文惠

惟瞻 嚴護大德文峭 善通 道遠 義琛 智矩

溥津 □□ 思悟 法實 義辛 覺恒 志俾

文迪 文定 善崇 寧進 □惠 思澄 思整

志脩 文照 文脩 法詮 惟換 從因 文思

口表 瓊般 崇秘 智遠 行奇 道辛 文偲

文惣 文寂 惟曉 口指 善堪 惟謙 文暉

文蹟 師遵 法昧 令宿 惣提大德元操梵書

口口 蘊銳 鮮祐 德俊 戒懿 義表 法遵

圓興 仁英 文蔚 口祥 悟口 文安 瓊積

方敬 思歧 蘊肅 道祥 蘊奇 蘊碧 凝元

智遍 文勢 文適 紹極 師戒 善壇 法舟

賢初 法干 口因 智蒨 善規 法信 善巧

義潛 崇諦 行寂 方智 方諫 口口 口口

口口 口口 道夔 義疎 文偉 師哲 思慇

瓊白 口口 文脩 惠愷 法照 義聰 方允

令祥 運舟 行蘊 方溫 口口 文遜 義卞

運初 文鮮 遵裕 文聘 義戩 圓述 義楷

口琮 文儼 道泉 悟了 道涓 道殊 了非

道遷 融侶 圓瓊 口口 法口 義存 悟元

圓峒 裕達 智燈 文昱 方迥 文諦 口口

思非 圓徹 義存 溥濁 道奇 從訓 圓易

戒企 文脩 師口 諦延 行確 思齊 文直

方運 義澄 道永 方省 弃塵 口口 鮮曦

令宵 義敷 圓揆 文端 蘊迪 師偉 思宏

道逾 口瓊 諸達 智淵 方忖 義貞 云敷

了名 師延 戒琮 罔宗 口融 智微 遵行

令珪 義泉 道炳 圓琛 覺或 善安 士謹

口口 遵儀 了忠 省謙 惠瑕 思惠 蘊穆

圓湛 義宣 圓性 口口 方桂 圓心 口煜

悟直 文演 義澄 融徹 裕著 融性 口口

文儼 志殊 圓蓋 言遜 義達 智照 大德 蘊孚

義性 義賢 口口 道如 圓全 裕勲 圓燈

圓成 圓幽 鮮景 恒殊 文廣 口口 圓深

瓊勗 圓翌 義深 崇彥 覺性 豐彥 師訓

思冲 □□ 裕通 師證 令矩 師賢 悟儔

宗正 鮮凝 圓智 悟圓 □□ □□ 方戒

行灌 行本 省微 師映 瓊潤 融鮮

□□ 智如 融昶 圓英 □□ □□ 智穎

融智 行蓮 鮮詠 □□ 融鮮 圓吉 蘊如

詮□ □□ □□ 詮膚 行果 圓求 □□

圓修 義俊 善旻 惠雲 義□ 智幽 義元

蘊謙 行彛 □□ 志裕 義隆 行充 裕良

卽均 志固 義冲 融□ 方榮 □□ 圓相

運慈 道冲 遵止 志誠 覺冲 義窺 道□

現行

口口口口勤口共二百四十人內六十人講流

誦法華經一百三十人

故蓋閣都作頭右承制銀青崇祿大夫兼監察御史

武騎尉康日永

蓋殿寶塔都作頭右承制銀青崇祿大夫兼監察御

史武騎尉姪敬

前閣主法資

舍利一十二粒銀鵲餅內圓性

新添佛事諸物等

小金餅一崇國寺樞大師施

銀觀音菩薩一尊當寺通法大師施并諸餘口物有
碣子

銀塔一坐當寺竦座主施

玉錢一韓家小娘子施

銀淨瓶一內有舍利九粒 銀錢一 火鏡鬼一

火珠一 珠子藥袋一已上物千齡院尼寺主守因
施

金結囊一 勃海珠子兩個 珊瑚一 玻璃一

水晶垂頭一 花銀錢二 玉羊兒一 玉狗兒一

玉夾板墜子一副 玉墜子一 玉弼口一 銅
狗兒一 銀釵子一 玉匣兒一 銀餅一 龍腦
兩斤 舍利五百粒在藥玉餅內 鋤石淨餅一
鑰匙筋一 小金剛子數珠一串上有珠子一十
五个玉錢一金楞玉滴子一對尼雲開施

口合一內有舍利一百餘粒仙露寺尼端正施

當寺蘊謙施菱餅一內舍利伍粒

制置同知夫人施銀筒子一內舍利三十粒

閣殿砌匠作頭蔡惟亨 世千

太原王惟約刻

憫忠寺內戒壇前有遺幢一乃爲寺尼薦福刻者幢
後置有石函一函四周刻字首行標題大遼燕京大
憫忠寺紫褐師德大衆等次書覺晟等四人以下駢
書諸僧名凡三百七十人又書康日永等三人天水
嚴甫書太原王惟約刻最後刻布施諸物石函不記
年號相傳爲緘舍利利用者其舍利等則不可考矣
定日下
舊聞考

按石函題名不紀年號題稱大遼燕京大憫忠寺
前有賜紫沙門善製與下碑舍利函記之功德主
同名下碑爲大安十年則此碑當與同時矣題稱

紫衣爲紫褐初見此碑其僧職有曰懺悔師鈔主
有曰懺悔主亦他碑所未見後列職官二人曰蓋
閣都作頭曰蓋殿寶塔都作頭似係修寺時權宜
設置之官也石函多紀施舍利之事其藏器有銀
鶴餅小金餅銀淨瓶藥玉瓶鍤石淨餅銀筒子其
增飾諸器者有玉錢銀錢花銀錢火鏡火珠勃海
珠珊瑚玻璃金結裘水晶垂頭玉羊王猗玉墜子
玉弼銅狗銀釵玉匣龍腦鍤石匙筋此外有銀觀
音菩薩一尊銀塔一坐小金剛子數珠一串金楞
玉滴子一對菱似與球通用垂頭似與墜頭通用

狗字見韻會本作狗字鑰石見玉篇鑰石似金格
古要論云自然銅之精也据此所紀想見當時物
力饒裕故所施之美麗如此

惘忠寺舍利函記

石高廣俱二尺五寸十大行行
十七字正書在京師惘忠寺

燕京大惘忠寺觀音菩薩地官舍利函記

門人義中書

恭聞應物爲現利樂無窮者大聖觀音有感克從功德
巨測者靈蹤舍利金言所載寶牒攸存善製肇紉巨社
會萬人金玉之資欲滿宿心塑百尺水月之像將圖寶

相先實地官化檀那近百千家獲舍利餘一萬粒封以
金匱貯以石函圓淨璨然寔爲神異所冀光徹無間之
獄福洽有頂之天良因不虛巨利斯在上願

我國家二儀齊於聖壽兩耀等於文明三寶長隆四方
永肅八難除一十四種之怖畏四生見三十二應之威
神獲圓通之法門願大作於佛事

大安十年歲次甲戌閏四月辛未朔二十二日壬辰
甲時

功德主燕京管內左右街都僧錄崇祿大夫檢校太
師行鴻臚卿聰辯大師賜紫沙門善製

帝京景物略云寺中一碑下半斷裂可讀者其上段
字有燕京大興忠寺觀音地官舍利函記金大安十
年沙門善製按是碑文字悉完未嘗斷裂末云大安
十年歲次甲戌閏四月辛未朔二十二日壬辰申時
功德主燕京管內左右街都僧錄崇錄大夫檢校太
師行鴻臚卿聰辯大師賜紫沙門善製門人義中書

日下
舊聞

碑所稱大安十年乃遼道宗年號帝京景物畧目爲
金時物蓋金衛紹王亦改元大安因致誤耳考金衛
紹王稱大安者祇三年此云十年可知其非金大安

矣其撰文之僧名又見前所載遼時石函上蓋同時

物也

欽定日下舊聞考

涿州雲居寺續秘藏石經塔記

幢約高五尺八面而廣八寸七分至九分不等前四
面皆五行行卅四字後三面皆七行行四十字其第
五面六行二行屬前四行屬後正書在房山縣

大遼涿州涿鹿山雲居寺續秘藏石經塔記

題題沙門志才撰

古之碑者用木爲之乃葬祭饗聘之際所植一大木而
字从石者取其堅而久也後人銘功其上不忍去之自
秦漢已降生而有功德政事者亦碑之欲圖不朽易之

以石雖失其本從來所尚不可廢焉噫秦梵書後聖人
經典多刻貞石亦類碑而已矣且 浮圖經教來自

西國梵文貝葉此譯華言盡書竹帛或邪見而毀滅或
濕水而漂溺或兵火而焚蕪或時久而蝨爛孰更印度
求請與由是教壞理隱行亾果惑群生蠢蠢盡陷苦途
實可悲夫 有隋沙門靜琬深慮此事厲志發願於

大業季中至涿鹿山以大藏經刻於貞珉藏諸山寶大
願不終而掩化門人導公儀公暹公法公師資相踵五
代造經亦未滿師願至 大遼畱公法師奏

閔聖宗皇帝賜普度壇利錢續而又造次

金石錄卷一百三十一
興宗皇帝賜錢又造相國楊公遵勗梁公穎奏

開道宗皇帝賜錢造經四十七帙通前上石其計一百八十七帙已曆東峯七石室內見今大藏仍未及半有故上人通理大師繡林秀出名實俱高教風一扇草偃八宏其餘德業具載寶峯本寺遺行碑中師因游茲山寓宿其寺慨石經未圓有續造之念興無緣慈爲不請友至大安九年正月一日遂於茲寺開放戒壇仕庶道俗入山受戒叵以數知海會之衆孰敢評之師之化緣寔亦次之方盡暮春始得終罷所獲施錢乃萬餘錢付門人見右街僧錄通慧圓照大師善定校勘刻石

石類印板背面俱用鐫經兩紙至大安十年錢已費盡
功且權止碑四千八十斤經四十四帙題名目錄具列
如左未知後代更更繼之又有門人講經沙門善銳念
先師遺風不能續扇經碑未藏或有殘壞遂與定
師共議募功至天慶七年於寺內西南隅穿地爲穴

道宗皇帝所辦石經大碑一百八十斤通理大師
所辦石經小碑四千八十斤皆藏瘞地穴之內上築臺
砌甃建石塔一坐刻文標記知經所在皆蘇州重慶寺
法華院石壁經請白樂天撰碑有水火不能燒漂風日
不能搖消等文乃國手大才今命余作記口合抱慙閣

筆奈是善緣勉而直書

通理大師所辦石經小碑四千八十斤經四十四帙

大佛頂如來密因修證了義諸菩薩萬行首楞嚴經十

卷詩

一帙

菩薩地持經十卷賢

一帙

菩薩善戒經九卷

淨業障經一卷剋

一帙

優婆塞戒經七卷梵網經二卷

受十口戒經一卷念

一帙

菩薩瓔珞本業經二卷佛藏

經四卷菩薩善戒經一卷作

一帙

菩薩內戒經一卷

優口塞五戒威儀經一卷大乘三聚懺悔經一卷菩薩

五法懺悔文一卷菩薩藏經一卷三曼陀陀羅菩薩

經一卷菩薩受齋經一卷舍利弗悔過經一卷文殊悔

通經一卷法律三昧經一卷十善業道經一卷聖帙

大智度論一百卷十帙德建名立形端表正空谷 十

地經論十二卷傳一帙 弥勒菩薩所問經論五卷大乘

寶積經論四卷寶髻菩薩四法經論一卷聲一帙 佛地

經論七卷金剛般 若論二卷虛一帙 金剛般若波羅

密經破取著不壞假名論二卷文殊師利菩薩問菩提

經論二卷堂一帙 勝思惟梵天所問經論四卷涅槃論

一卷涅槃經本有今無偈論一卷遺教經論一卷三具

足經論一卷無量壽經論一卷轉法輪經論一卷習一帙

瑜伽師地論一百卷十帙 聽禍因惡積福緣善慶

尺 顯揚聖教論二十卷 辟非二 瑜伽師地論釋一

卷顯揚聖教論頌一卷 王法正理論一卷 大乘阿毗達

磨集論七卷 寶一 大乘阿毗達磨雜集論十六卷 中

論四卷 寸陰二 般若燈論釋十五卷 十二門論一卷

十八空論一卷 百論二卷 廣百論本一卷 是鏡二 大

乘廣百釋論十卷 資一 成唯識論十卷 盡一 大丈

夫論二卷 入大乘論二卷 大乘掌珍論二卷 大乘五蘊

論一卷 大乘廣五蘊論一卷 大乘起信論一卷 寶行王

正論一卷 命一 摩訶衍論十卷 寧一 大乘本生心

地觀經八卷 壁一 大乘理趣六波羅蜜經十卷 杜一

道宗皇帝所辦石經大碑一百八十斤 十住斷結經
碑五斤 花手經碑二十五斤 佛名經碑二十斤
大威德 羅尼經碑二十八斤 摩訶摩耶經碑一斤
菩薩瓔珞經碑一十一斤 大法炬陀羅尼經碑三
十斤 五千五百佛名經碑一十三斤 不空羼口神
變真言經碑七斤 賢劫經碑一十八斤 入法界體
經碑一斤 須臾太子經碑一斤 佛說德護長者經
碑二斤 超日明三昧經碑五斤 佛說浴像功德經
碑一斤 未曾有因緣經碑二斤 不思議功德諸佛
所護念經碑三斤 佛說成具光明定意經碑一斤

佛說妙法決定業障經碑一庁 佛說寶網經碑一庁
過去莊嚴劫千佛名經碑一庁 未來星宿劫千佛
名經碑一庁 見在賢劫千佛名經碑二庁
天慶八年戊戌朔五月戊午十七日戊戌甲寅時建
燕臺沙門惟和書

夫見古之燕壙得銘石者其石溫潤其字分明今經碑
穿地穴秘藏者取久固不毀者也 沙門志德鵠

富寺首座沙門志珂

寺主講論沙門志慙

尙座講經沙門善相

都和講經沙門志興

按此石經塔記卽帝京景物畧所載天慶八年沙

門志才碑是也記稱雲居寺石經遼時聖宗興宗
皆賜錢續造至是則道宗又賜錢造之而猶未圓
至大安九年十年兩次鑄經凡碑四千八十片經
四十四帙後列歷次辦經目錄每十卷爲一帙皆
標千字文爲號與今大藏同例碑建於天慶八年
戊戌朔五月戊午十七日戊戌甲寅時天慶爲天
祚紀元距遼之亡僅七年耳戊缺筆作戌六朝書
體如此天慶八年爲戊戌歲此云戊戌朔意不可
曉五月戊午不加朔字乃月建也下云十七日戊
戌甲寅時戊戌是日推其朔乃壬午不用朔而用

建又一例也

慈悲菴大德幢記

幢高五尺三寸八面各廣六寸二分四行每行
字數三十七人九不等正書在京師黑密殿
故慈智大德佛頂尊勝大悲隨羅尼幢

唐開元三朝灌頂國師和尚特進試鴻臚卿開府儀
同三司肅國公食邑三千戶實封三百戶贈司空謚
大辯正大廣智大興善寺三藏沙門不空奉 詔譯
講律論比丘德麟書

咒不錄

大遼燕京大憫忠寺故慈智大德幢記

師諱惟服俗姓魏氏潯陰田陽人也少歲禮憫忠寺守
淨上人落髮誦白蓮經遇恩得度師志在雜花行依四
分其他典論有口力通後因遊方止于上都別創精藍
掛錫而住大安九年會門人覺智大師詔赴闕庭因
遠駐聽乃特賜紫衣慈智之號壽昌四年三月九日
因疾奄化于隰口講院至五年四月十三日葬于京東
先師塋側師行也以精進心口不退輪以勇健力竭無
畏鼓講說群經口口口口讀雜花密一百遍儀範所攝
惠用所誘貴高曾慢罔不欽伏其威重如是心行禪身
持律起居動息皆有常節雖冱寒隆暑風雨黑夜禮佛

誦經手不釋卷四十餘年凡十二時未嘗闕一其精進
如是師既疾忝四大將壞無戀著念無狀離想門弟子
饋藥數四師報之云色身終壞烏用是爲言訖惟然就
化其子悟如是臨終之日暴風忽起晝如暗夜對面莫
親伯師遷逝俄然乃止門人仰師之德感師之恩極靈
骨於其下樹窻幢於其上欲存不朽以示將來時壽昌
五年歲次己卯四月十三日乙時記

門人管內左街僧錄判官覺智大師賜紫沙門文傑
門人泰元沙門文偉 法孫五人歸心 國全

國成 國翌 國欽

按此幢前刻大悲陀羅尼咒比邱德麟書後刻幢
記不著撰者何人蓋爲其師惟康作也記云惟康
鄆陰田陽人遼史地理志鄆陰縣屬南京析津府
本漢泉山之霍村鎮田陽地名無攷記作於道宗
壽隆五年己卯歲碑云壽昌者卽壽隆也碑署年
月下云四月十三日乙時不用支而用幹與戒壇
寺陀羅尼幢同皆當時書碑之一例

金石萃編卷一百五十三終